

ओं नमः परमात्मने, श्री महागणपतये नमः,
श्री गुरुभ्यो नमः, हरिः ओं
—

कृष्ण यजुर्वेदीय तैत्तिरीय संहिता पद पाठः (वाक्य सहित)

चतुर्थकाण्डे प्रथमः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in

Table of Contents

4 कृष्ण यजुर्वेदीय तैत्तिरीय संहितायां पद पाठे चतुर्थ
काण्डं 3

4.1 चतुर्थकाण्डे प्रथमः प्रश्नः– अग्निचित्यङ्ग

मन्त्रपाठाभिधानं 3

ओं नमः परमात्मने, श्री महागणपतये नमः,

श्री गुरुभ्यो नमः , हरिः ॐ

4 कृष्ण यजुर्वेदीय तैत्तिरीय संहितायां पद पाठे चतुर्थ काण्डं

4.1 चतुर्थकाण्डे प्रथमः प्रश्नः– अग्निचित्यङ्ग मन्त्रपाठाभिधानं

4.1.1.1

यु॒ञ्जानः॑ प्र॒थमं॑ मन॒स्तत्वा॑य सवि॒ता धि॑यः ।
अ॒ग्निं ज्यो॑तिर्नि॒चाय्य॑ पृथि॒व्या अ॒ध्या ऽभ॑रत् ।
यु॒क्त्वाय॑ मन॒सा दे॒वान्त् सु॒वर्य॑तो धि॒या दि॑वं ।
बृ॒हज्ज्यो॑तिः करि॒ष्यतः॑ सवि॒ता प्र॑सुवति तान् ।
यु॒क्तेन॑ मन॒सा वयं॑ दे॒वस्य॑ सवि॒तुः स॒वे । सु॒वर्गे॑याय श॒क्त्यै॑ ।
यु॒ञ्जते॑ मन॒ उत॑ यु॒ञ्जते॑ धि॒यो वि॒प्रा वि॒प्रस्य॑ बृ॒हतो॑ वि॒पश्चितः॑ ।
वि हो॒त्रा दधे॑ वयु॒ना विदे॑क इन् – [] 1

4.1.1.1 - Padam

यु॒ञ्जानः॑ । प्र॒थम॑म् । मनः॑ । तत्त्वा॑य । स॒विता॑ । धि॒यः॑ । अ॒ग्निम् ।
ज्योतिः॑ । नि॒चाय्ये॑ति नि – चा॒य्य । पृ॒थि॒व्याः॑ । अधि॑ । एति॑ ।
अ॒भर॑त् । यु॒क्त्वा॑य । मन॑सा । दे॒वान् । सु॒वः॑ । य॒तः॑ । धि॒या ।
दि॒वम्॑ । बृ॒हत् । ज्योतिः॑ । क॒रि॒ष्य॒तः॑ । स॒विता॑ । प्रेति॑ । सु॒वा॒ति ।
तान् । यु॒क्ते॑न । मन॑सा । व॒यम् । दे॒वस्य॑ । स॒वि॒तुः॑ । स॒वे ।
सु॒व॒र्गे॒या॒येति॑ सु॒वः – गे॒या॒य । श॒क्त्यै॑ । यु॒ञ्ज॒ते॑ । मनः॑ । उ॒त ।
यु॒ञ्ज॒ते॑ । धि॒यः॑ । वि॒प्राः॑ । वि॒प्र॒स्य । बृ॒ह॒तः॑ । वि॒प॒श्चि॒तः॑ । वी॒ति ।
हो॒त्राः॑ । द॒धे । व॒यु॒ना॒वि॒दि॒ति॑ व॒यु॒न – वि॒त् । ए॒कः॑ । इ॒त् । 1 (50)

4.1.1.2

म॒ही दे॒वस्य॑ स॒वि॒तुः॑ परि॒ष्टु॒तिः॑ । यु॒जे॑ वां ब्र॒ह्म पू॒र्व्यं नमो॑भिर्वि
श्लो॒का य॒न्ति॑ प॒थ्ये॒व सू॒राः॑ । शृ॒ण्व॒न्ति॑ वि॒श्वे॑ अ॒मृत॑स्य पु॒त्रा आ ये॑
धा॒मानि॑ दि॒व्यानि॑ त॒स्थुः॑ । यस्य॑ प्र॒या॒ण॒म॒न्व॒न्य इ॒द्य॒यु॒र्दे॒वा दे॒वस्य॑
म॒हि॒मा॒न॒म॒र्च॒तः॑ । यः पा॒र्थि॒वा॒नि वि॒म॒मे स ए॒त॒शो र॒जाँ॒सि दे॒वः॑
स॒वि॒ता म॒हि॒त्व॒ना । दे॒व स॒वि॒तः॑ प्र॒सु॒व य॒ज्ञं प्र॒सु॒व – [] 2

4.1.1.2 - Padam

म॒ही । दे॒वस्य॑ । स॒वि॒तुः । परि॑ष्टुतिरिति परि॑-स्तुतिः । यु॒जे । वा॒म् ।
ब्र॒ह्म । पू॒र्व्यम् । नमो॑भिरिति नमः॑ – भिः । वी॒ति । श्लो॒काः ।
य॒न्ति । प॒थ्या । इ॒व । सू॒राः । शृ॒ण्वन्ति । वि॒श्वे । अ॒मृत॑स्य । पु॒त्राः ।
ए॒ति । ये । धा॒मानि॑ । दि॒व्यानि॑ । त॒स्थुः । यस्य॑ । प्र॒याण॑मिति
प्र – या॒नम् । अ॒न्विति॑ । अ॒न्ये । इ॒त् । य॒युः । दे॒वाः । दे॒वस्य॑ ।
म॒हि॒मा॒नम् । अ॒र्च॒तः । यः । पा॒र्थि॒वानि॑ । वि॒म॒म इति॑ वि – म॒मे ।
सः । ए॒त॒शः । र॒जा॒सि॑ । दे॒वः । स॒वि॒ता । म॒हि॒त्व॒नेति॑ म॒हि॒-त्व॒ना ।
दे॒व । स॒वि॒तः । प्रेति॑ । सु॒व । य॒ज्ञम् । प्रेति॑ । सु॒व । 2 (50)

4.1.1.3

य॒ज्ञ॒प॒तिं॑ भ॒गाय॑ दि॒व्यो ग॒न्धर्वः॑ । के॒त॒पूः॑ के॒त॒न्नः॑ पु॒नातु॑
वा॒च॒स्प॒ति॒र्वा॒च॒म॒द्य स्व॑दाति नः । इ॒मं नो॑ दे॒व स॒वि॒त॒र्य॒ज्ञं प्र॑सुव
दे॒वा॒यु॒वꣳ स॒खि॒वि॒दꣳ स॒त्रा॒जि॒तं॑ ध॒न॒जि॒तꣳ सु॒व॒र्जि॒तं॑ ।
ऋ॒चा स्तो॒मꣳ स॒म॒र्ध॒य गा॒य॒त्रेण॑ रथ॒न्त॒रं । बृ॒ह॒द्-गा॒य॒त्र॒व॒र्त॒नि ।

दे॒वस्य॑ त्वा स॒वितुः॑ प्र॒सवे॑ ऽश्विनो॑र्बा॒हुभ्यां॑ पू॒ष्णो हस्ता॑भ्यां
गाय॒त्रेण॑ छन्द॒सा ऽददे॑ ऽङ्गिर॒स्वद॑भिर॒सि नारि॑ – [] 3

4.1.1.3 - Padam

य॒ज्ञप॑तिमि॒ति य॒ज्ञ – प॒तिम् । भगा॑य । दि॒व्यः । ग॒न्धर्वः॑ । के॒तपू॑रि॒ति
के॒त – पूः॑ । के॒तम् । नः॑ । पु॒नातु॑ । वा॒चः । प॒तिः । वा॒चम् । अ॒द्य ।
स्व॒दाति॑ । नः॑ । इ॒मम् । नः॑ । दे॒व । स॒वितः॑ । य॒ज्ञम् । प्रे॑ति । सु॒व ।
दे॒वायु॑वमि॒ति दे॒व – यु॒वम् । स॒खिवि॑दमि॒ति स॒खि – वि॑दम् ।
स॒त्राजि॑तमि॒ति स॒त्र – जि॑तम् । ध॒नजि॑तमि॒ति ध॒न – जि॑तम् ।
सु॒वर्जि॑तमि॒ति सु॒वः – जि॑तम् । ऋ॒चा । स्तो॑मम् । स॒मिति॑ । अ॒र्धय॑ ।
गाय॒त्रेण॑ । र॒थन्त॑रमि॒ति र॒थं – त॑रम् । बृ॒हत् । गा॒यत्र॑व॒र्तनी॑ति
गा॒यत्र॑ – व॒र्तनि॑ । दे॒वस्य॑ । त्वा । स॒वितुः॑ । प्र॒सव॑ इति प्र – स॒वे ।
अ॒श्विनोः॑ । बा॒हुभ्या॑मि॒ति बा॒हु – भ्या॑म् । पू॒ष्णः । हस्ता॑भ्याम् ।
गाय॒त्रेण॑ । छ॒न्दसा॑ । ए॒ति । द॒दे । अ॒ङ्गिर॒स्वत् । अ॒भिः । अ॒सि ।
ना॒रिः । 3 (50)

4.1.1.4

–रसि पृथिव्याः सधस्थादग्निं पुरीष्यमङ्गिरस्वदा भर त्रैष्टुभेन त्वा
छन्दसा ऽददेऽङ्गिरस्वद्–बभ्रिरसि नारिरसि त्वया वयं सधस्थ
आग्निं शक्रेम खनितुं पुरीष्यं जागतेन त्वा छन्दसा
ऽददेऽङ्गिरस्वद्धस्त आधाय सविता बिभ्रदभिं हिरण्ययीं ।
तया ज्योतिरजस्र–मिदग्निं खात्वी न आ भरानुष्टुभेन त्वा
छन्दसा () ऽददेऽङ्गिरस्वत् । 4

4.1.1.4 - Padam

असि । पृथिव्याः । सधस्थादिति सध – स्थात् । अग्निम् ।
पुरीष्यम् । अङ्गिरस्वत् । एति । भर । त्रैष्टुभेन । त्वा । छन्दसा ।
एति । ददे । अङ्गिरस्वत् । बभ्रिः । असि । नारिः । असि । त्वया ।
वयम् । सधस्थ इति सध – स्थे । एति । अग्निम् । शक्रेम ।
खनितुम् । पुरीष्यम् । जागतेन । त्वा । छन्दसा । एति । ददे ।
अङ्गिरस्वत् । हस्ते । आधायेत्या – धाय । सविता । बिभ्रत् ।
अभिम् । हिरण्ययीम् । तया । ज्योतिः । अजस्रम् । इत् । अग्निम् ।

खा॒त्वी । नः । ए॒ति । भ॒र । आ॒नु॒ष्टु॒भे॒ने॒त्या॒नु – स्तु॒भे॒न । त्वा ।
छ॒न्द॒सा () । ए॒ति । द॒दे । अ॒ङ्गि॒र॒स्व॒त् । 4 (53) (इ॒द् – य॒ज्ञं प्र॒सु॒व
– ना॒रि – रा॒नु॒ष्टु॒भे॒न त्वा छ॒न्द॒सा – त्री॒णि च) (A1)

4.1.2.1

इ॒मा॒म॒गृ॒भ्ण॒न् र॒श॒ना॒मृ॒त॒स्य॒ पू॒र्व आ॒यु॒षि वि॒द॒थे॒षु क॒व्या ।
तया॑ दे॒वाः सु॒त॒मा ब॒भू॒वुर्. ऋ॒त॒स्य॒ सा॒म॒न्त् सर॒मा॒र॒प॒न्ती ।
प्र॒तूर्तं॑ वा॒जि॒न्ना द्र॒व व॒रि॒ष्ठा॒म॒नु सँ॒वतं॑ । दि॒वि ते जन्म॑ प॒र॒म॒म॒न्त॒रि॒क्षे
ना॒भिः पृ॒थि॒व्या॒म॒धि यो॒निः । यु॒ञ्जा॒था रा॒स॒भं यु॒व॒म॒स्मिन् या॒मे
वृ॒ष॒ण्व॒सू । अ॒ग्निं भ॒र॒न्त॒म॒स्म॒युं । यो॒गे॒यो॒गे त॒व॒स्तरं॑ वा॒जे॒वा॒जे
ह॒वा॒म॒हे । स॒खा॒य इ॒न्द्र॒मू॒त॒ये । प्र॒तूर्व॑ – [] 5

4.1.2.1 - Padam

इ॒मा॒म् । अ॒गृ॒भ्ण॒न् । र॒श॒ना॒म् । ऋ॒त॒स्य॑ । पू॒र्वे । आ॒यु॒षि । वि॒द॒थे॒षु ।
क॒व्या । तया॑ । दे॒वाः । सु॒त॒म् । ए॒ति । ब॒भू॒वुः । ऋ॒त॒स्य॑ । सा॒म॒न् ।
सर॒म् । आ॒र॒प॒न्ती॒त्या – र॒प॒न्ती । प्र॒तूर्त॑मि॒ति॒प्र – तूर्त॑म् । वा॒जि॒न् ।
ए॒ति । द्र॒व । व॒रि॒ष्ठा॒म् । अ॒न्वि॒ति । सँ॒वत॑मि॒ति॒सं – व॒त॒म् । दि॒वि ।

ते॑ । जन्म॑ । पर॒मम् । अन्त॑रिक्षे । नाभिः॑ । पृ॒थि॒व्याम् । अधी॑ति ।
योनिः॑ । यु॒ञ्जा॒थाम् । रा॒स॒भम् । यु॒वम् । अ॒स्मिन् । यामे॑ । वृ॒ष॒ण्व॒सू
इति॑ वृष॒ण् – व॒सू । अ॒ग्निम् । भ॒रन्त॑म् । अ॒स्मयु॑मित्य॒स्म – युम् ।
यो॒गे॒यो॒ग इति॑ यो॒गे – यो॒गे । तव॑स्तरमि॒ति तवः॑ – तर॒म् । वा॒जे॒वा॒ज
इति॑ वा॒जे – वा॒जे । ह॒वाम॑हे । स॒खायः॑ । इन्द्र॑म् । ऊ॒तये॑ ।

प्रतूर्व॑न्निति प्र – तूर्व॑न् । 5 (50)

4.1.2.2

– नै॒ह्यव॑क्रामन्नश॑स्ती रु॒द्रस्य॑ गा॒णप॑त्यान् मयो॒भूरे॑हि ।
उर्व॑न्तरि॒क्षम॑न्विहि स्व॒स्ति ग॑व्यूतिरभ॒यानि॑ कृ॒ण्वन् ।
पू॒ष्णा स॒युजा॑ सह । पृ॒थि॒व्याः स॒धस्था॑दग्निं पु॒रिष्य॑ – म॒ङ्गिर॑स्व –
द॒च्छे॒ह्यग्निं॑ पु॒रीष्य॑ – म॒ङ्गिर॑स्वद – च्छे॒मोऽग्निं॑ पु॒रीष्य॑ – म॒ङ्गिर॑स्वद् –
भ॒रिष्या॑मोऽग्निं पु॒रीष्य॑ – म॒ङ्गिर॑स्वद् – भ॒रामः॑ । अ॒न्व॒ग्निरु॑षसा –
म॒ग्रम॑ख्य – द॒न्वहा॑नि प्रथ॒मो जा॑तवे॒दाः । अनु॑ सूर्य॒स्य – [] 6

4.1.2.2 - Padam

ए॒ति॑ । इ॒हि॒ । अ॒व॒क्राम॑न्नित्य॒व – क्राम॑न् । अ॒श॒स्तीः॑ । रु॒द्रस्य॑ ।
गा॒णप॑त्यादि॒ति गा॒ण – प॒त्यात् । म॒यो॒भूरि॑ति॒ मयः॑ – भूः । ए॒ति॑ ।
इ॒हि॒ । उ॒रु । अ॒न्तरि॑क्षम् । अ॒न्वि॒ति॑ । इ॒हि॒ । स्व॒स्तिग॑व्यूति॒रिति॑
स्व॒स्ति – ग॒व्यूतिः॑ । अ॒भया॑नि । कृ॒ण्वन् । पू॒ष्णा । स॒युजे॑ति
स – यु॒जा॑ ॥ स॒ह । पृ॒थि॒व्याः । स॒धस्था॑दि॒ति स॒ध – स्था॒त् ।
अ॒ग्निम् । पु॒रिष्य॑म् । अ॒ङ्गिर॑स्वत् । अ॒च्छ । इ॒हि॒ । अ॒ग्निम् ।
पु॒रीष्य॑म् । अ॒ङ्गिर॑स्वत् । अ॒च्छ । इ॒मः । अ॒ग्निम् । पु॒रीष्य॑म् ।
अ॒ङ्गिर॑स्वत् । भ॒रिष्या॑मः । अ॒ग्निम् । पु॒रीष्य॑म् । अ॒ङ्गिर॑स्वत् ।
भ॒रामः॑ । अ॒न्वि॒ति॑ । अ॒ग्निः । उ॒ष॒साम् । अ॒ग्रम् । अ॒ख्य॑त् ।
अ॒न्वि॒ति॑ । अ॒हा॒नि । प्र॒थमः॑ । जा॒तवे॑दा इति॒ जा॒त – वे॒दाः ।
अ॒न्वि॒ति॑ । सू॒र्यस्य॑ । 6 (50)

4.1.2.3

पु॒रु॒त्रा च॑ र॒श्मी॑न॒नु द्या॑वापृ॒थि॒वी आ॑ त॒तान॑ । आ॒गत्य॑ वा॒ज्यध्व॑नः
स॒र्वा मृ॑धो॒ वि॒धू॒नुते॑ । अ॒ग्नि॒ꣳ स॒धस्थे॑ म॒हति॑ चक्षु॒षा नि॑ चि॒की॒षते॑ ।

आ॒क्र॒म्य॑ वा॒जिन् पृ॒थि॒वीम॒ग्निमि॑च्छ रु॒चा त्वं ।
भू॒म्या वृ॒त्वाय॑ नो ब्रू॒हि यतः॑ ख॒नाम॑ तं व॒यं ।
द्यौ॑स्ते पृ॒ष्ठं पृ॒थि॒वी स॒धस्थ॑मा॒त्मा ऽन्तरि॑क्ष॒ः स॒मु॒द्रस्ते॑ यो॒निः ।
वि॒ख्याय॑ चक्षु॒षा त्वम॑भि तिष्ठ- [] 7

4.1.2.3 - Padam

पु॒रु॒त्रेति॑ पु॒रु - त्रा । च । र॒श्मीन् । अ॒न्वि॒ति । द्या॒वा पृ॒थि॒वी इति॑
द्या॒वा - पृ॒थि॒वी । ए॒ति । त॒तान॑ । आ॒ग॒त्येत्या॑ - ग॒त्य । वा॒जी ।
अ॒ध्व॒नः । सर्वाः॑ । मृ॒धः । वी॒ति । धू॒नु॒ते । अ॒ग्नि॒म् । स॒धस्थ॑ इति॑
स॒ध - स्थे॑ । म॒ह॒ति । चक्षु॒षा । नी॒ति । चि॒की॒ष॒ते ।
आ॒क्र॒म्येत्या॑ - क्र॒म्य । वा॒जि॒न् । पृ॒थि॒वीम् । अ॒ग्नि॒म् । इ॒च्छ ।
रु॒चा । त्वम् । भू॒म्याः । वृ॒त्वाय॑ । नः । ब्रू॒हि । यतः॑ । ख॒नाम॑ । तम् ।
व॒यम् । द्यौः । ते । पृ॒ष्ठम् । पृ॒थि॒वी । स॒धस्थ॑मि॒ति स॒ध - स्थम् ।
आ॒त्मा । अ॒न्तरि॑क्षम् । स॒मु॒द्रः । ते । यो॒निः । वि॒ख्याये॑ति
वि - ख्या॑य । चक्षु॒षा । त्वम् । अ॒भी॒ति । तिष्ठ । 7 (50)

4.1.2.4

पृतन्यतः ।

उत्क्राम॑ मह॑ते सौ॒भगा॑या-स्मा॒दा॒स्था॒नाद् द्र॒वि॒णो॒दा वा॑जिन् ।
वय॑ꣳ स्या॒म सु॒मतौ॑ पृ॒थि॒व्या अ॒ग्निं ख॑निष्यन्त॒ उप॒स्थे अ॒स्याः ।
उद॑क्री॒द् द्र॒वि॒णो॒दा वा॒ज्य॒र्वा॒कः स लो॒कꣳ सु॒कृतं॑ पृ॒थि॒व्याः ।
ततः॑ ख॒नेम॑ सु॒प्रती॑कम॒ग्निꣳ सु॒वो रु॒हाणा॑ अधि॒ नाक॑ उत्त॒मे ।
अ॒पो दे॒वीरु॑प॒ सृज॑ मधु॒मती॑रयक्ष्माय॒ प्रजा॑भ्यः ।
तासा॑ꣳ स्था॒नादु॒ज्जि॒हता॑-मोष॒धयः॑ सु॒पिप्प॒लाः । जिघ॑र्म्य- [] 8

4.1.2.4 - Padam

पृत॒न्यतः॑ । उ॒दि॒ति । क्रा॒म । मह॑ते । सौ॒भगा॑य । अ॒स्मात् ।
आ॒स्था॒नादि॒त्या - स्था॒नात् । द्र॒वि॒णो॒दा इति॑ द्र॒वि॒णः - दाः ।
वा॒जिन् । वय॑म् । स्या॒म । सु॒मता॑वि॒ति सु - म॒तौ । पृ॒थि॒व्याः ।
अ॒ग्निम् । ख॒निष्य॑न्तः । उ॒प॒स्थ इत्यु॑प - स्थे । अ॒स्याः । उ॒दि॒ति ।
अ॒क्री॒त् । द्र॒वि॒णो॒दा इति॑ द्र॒वि॒णः - दाः । वा॒जी । अ॒र्वा । अ॒कः ।
सः । लो॒कम् । सु॒कृत॑मि॒ति सु-कृत॑म् । पृ॒थि॒व्याः । ततः॑ । ख॒नेम॑ ।

सु॒प्र॒ती॒क॒मि॒ति॒ सु॒-प्र॒ती॒क॒म् । अ॒ग्नि॒म् । सु॒वः॑ । रु॒हा॒णाः॑ । अधी॒ति॑ ।
ना॒के॑ ॥ उ॒त्त॒म इ॒त्यु॒त् - त॒मे॒ । अ॒पः॑ । दे॒वीः॑ । उ॒पे॒ति॑ । सृ॒ज॒ ।
म॒धु॒म॒ती॒रि॒ति॒ म॒धु॒ - म॒तीः॑ । अ॒य॒क्ष्मा॒य॒ । प्र॒जा॒भ्य॒ इति॑ प्र॒-जा॒भ्यः॑ ।
ता॒सा॒म् ॥ स्था॒ना॒त् ॥ उ॒दि॒ति॑ । जि॒ह॒ता॒म् । ओ॒ष॒धयः॑ ।

सु॒पि॒प्प॒ला इति॑ सु॒ - पि॒प्प॒लाः॑ । जि॒घ॒र्मि॑ । 8 (50)

4.1.2.5

-ग्निं॑ म॒न॒सा॒ घृ॒तेन॑ प्र॒ति॒क्ष्य॒न्तं॑ भु॒व॒ना॒नि॒ वि॒श्वा॑ ॥
पृ॒थुं॑ ति॒रश्वा॑ व॒य॒सा॒ बृ॒ह॒न्तं॑ व्य॒चि॒ष्ट॒म॒न्त्र॑ र॒भ॒सं॑ वि॒दा॒नं॑ ।
आ॒ त्वा॒ जि॒घ॒र्मि॑ व॒च॒सा॒ घृ॒तेना॑ऽर॒क्ष॒सा॒ म॒न॒सा॒ तज्जु॑षस्व ।
म॒र्य॑श्रीः॒ स्पृ॒ह॒य॒द्-व॒र्णो॑ अ॒ग्नि॒र्नाऽभि॑मृ॒शे॑ त॒नु॒वा॒ जर्ह॑षाणः ।
परि॑ वा॒ज॒प॒तिः॒ क॒वि॒र॒ग्नि॒र्ह॒व्या॒न्य॒क्र॒मी॒त् । द॒ध॒द् रत्ना॑नि॒ दा॒शु॒षे॑ ॥
परि॑ त्वा॒ग्ने॒ पुरं॑ व॒यं॑ वि॒प्र॒ सह॑स्य॒ धी॒म॒हि॑ । धृ॒ष॒द् वर्णं॑ दि॒वे॒दि॒वे॑
भे॒त्ता॒रं () भ॒ङ्ग॒रा॒व॒तः॑ । त्व॒म॒ग्ने॒ द्यु॒भि॒स्त्व॒-मा॒शु॒शु॒क्ष॒णि॒स्त्व॒-
म॒द्भ्य॑स्त्व॒-म॒श्म॑न॒स्प॒रि॑ । त्वं व॒ने॒भ्य॑ स्त्व॒मो॒ष॒धी॒भ्य॑ स्त्वं नृ॒णां॑ नृ॒प॒ते॑
जा॒य॒से॒ शु॒चिः॑ । 9

4.1.2.5 - Padam

अ॒ग्नि॒म् । म॒न॒सा । घृ॒तेन॑ । प्र॒ति॒क्ष्य॒न्त॒मि॒ति॑ प्र॒ति – क्ष्य॒न्त॒म् ।
भु॒व॒ना॒नि । वि॒श्वा॑ । पृ॒थु॒म् । ति॒रश्वा॑ । व॒य॒सा । बृ॒ह॒न्त॒म् । व्य॒चि॒ष्ठ॒म् ।
अ॒न्न॒म् । र॒भ॒स॒म् । वि॒दा॒न॒म् । ए॒ति॑ । त्वा । जि॒घ॒र्मि॑ । व॒च॒सा ।
घृ॒तेन॑ । अ॒रक्ष॑सा । म॒न॒सा । तत् । जु॒ष॒स्व । म॒र्य॒श्री॒रि॒ति॑ म॒र्य॒-श्रीः॑ ।
स्पृ॒ह॒य॒द्वर्ण॑ इति॑ स्पृ॒ह॒य॒त् – वर्णः॑ । अ॒ग्निः । न । अ॒भि॒मृ॒श
इ॒त्य॒भि॒-मृ॒शे॑ । त॒नु॒वा । ज॒र्ह॒षा॒णः । प॒री॒ति॑ । वा॒ज॒प॒ति॒रि॒ति॑
वा॒ज॒-प॒तिः॑ । क॒विः । अ॒ग्निः । ह॒व्या॒नि॑ । अ॒क्र॒मी॒त् । द॒ध॒त् ।
र॒त्ना॒नि । दा॒शु॒षे॑ । प॒री॒ति॑ । त्वा । अ॒ग्ने॑ । पु॒र॒म् । व॒य॒म् । वि॒प्र॒म् ।
स॒ह॒स्य॑ । धी॒म॒हि॑ । धृ॒ष॒द्वर्ण॑मि॒ति॑ धृ॒ष॒त् – वर्ण॑म् । दि॒वे॒दि॒व॒ इति॑
दि॒वे॒-दि॒वे॑ । भे॒त्ता॒र॒म् () । भ॒ङ्गु॒रा॒व॒त॒ इति॑ भ॒ङ्गु॒र॒-व॒तः॑ । त्व॒म् ।
अ॒ग्ने॑ । द्यु॒भि॒रि॒ति॑ द्यु॒-भिः॑ । त्व॒म् । आ॒शु॒शु॒क्ष॒णिः॑ । त्व॒म् । अ॒द्भ्य॑
इ॒त्य॒त् – भ्यः॑ । त्व॒म् । अ॒श्म॒नः॑ । प॒रि॑ । त्व॒म् । व॒ने॒भ्यः॑ । त्व॒म् ।
ओ॒ष॒धी॒भ्य॑ इ॒त्यो॒ष॒धि॑ – भ्यः॑ । त्व॒म् । नृ॒णा॒म् । नृ॒प॒त॒ इति॑ नृ॒-प॒ते॑ ।

जा॒य॒से । शु॒चिः । ९ (७०) (प्र॒तूर्व॑न्थ् – सू॒र्य॑स्य – तिष्ठ – जिघ॑र्मि
– भे॒त्तारं॑ – वि॒श्रु॑तिश्च) (A2)

4.1.3.1

दे॒व॒स्य॑ त्वा स॒वि॒तुः॑ प्र॒स॒वे॑ऽश्वि॒नो॑ बा॒हु॒भ्यां॑ पू॒ष्णो॑ ह॒स्ता॑भ्यां
पृ॒थि॒व्याः॑ स॒ध॒स्थे॑ऽग्निं पु॒री॒ष्य॑-म॒ङ्गि॒र॒स्वत्॑ ख॒ना॒मि ।
ज्यो॑तिष्मन्तं त्वा॒ग्ने सु॒प्र॒ती॒क॒म॒ज॒स्रे॒ण भा॒नु॒ना दी॒द्या॒नं ।
शि॒वं प्र॒जा॒भ्यो॑ऽहि॒ं स॒न्तं पृ॒थि॒व्याः॑ स॒ध॒स्थे॑ऽग्निं पु॒री॒ष्य॑-म॒ङ्गि॒र॒स्वत्॑
ख॒ना॒मि । अ॒पां पृ॒ष्ठ॒म॒सि स॒प्र॒था उ॒र्व॒ग्निं भ॒रि॒ष्य॑द॒प॒रा॒व॒पि॒ष्ठं ।
व॒र्ध॒मा॒नं म॒ह आ च पु॒ष्करं॑ दि॒वो मा॒त्र॒या व॒रि॒णा प्र॒थ॒स्व ।
श॒र्म च स्थो॑- [] 10

4.1.3.1 - Padam

दे॒व॒स्य॑ । त्वा । स॒वि॒तुः॑ । प्र॒स॒व इति॑ प्र – स॒वे । अ॒श्वि॒नोः॑ ।
बा॒हु॒भ्या॒मि॒ति बा॒हु – भ्या॒म् । पू॒ष्णः॑ । ह॒स्ता॑भ्या॒म् । पृ॒थि॒व्याः॑ ।
स॒ध॒स्थ इति॑ स॒ध – स्थे॑ । अ॒ग्नि॒म् । पु॒री॒ष्य॒म् । अ॒ङ्गि॒र॒स्वत्॑ ।
ख॒ना॒मि । ज्यो॑तिष्मन्तम् । त्वा । अ॒ग्ने ।

सु॒प्र॒ती॒क॒मि॒ति॒ सु॒ – प्र॒ती॒क॒म् । अ॒ज॒स्रे॒ण । भानु॑ना॒ ॥ दी॒द्या॒न॒म् ।
शि॒व॒म् । प्र॒जा॒भ्य॒ इति॑ प्र – जा॒भ्यः॑ । अ॒हि॒स॒न्त॒म् । पृ॒थि॒व्याः॑ ।
स॒ध॒स्थ॒ इति॑ स॒ध – स्थे॒ । अ॒ग्नि॒म् । पु॒री॒ष्य॒म् ॥ अ॒ङ्गि॒र॒स्व॒त् ।
ख॒ना॒मि॒ । अ॒पा॒म् । पृ॒ष्ठ॒म् । अ॒सि॒ । स॒प्र॒था॒ इति॑ स – प्र॒थाः॑ ॥ उ॒रु॒ ।
अ॒ग्नि॒म् । भ॒रि॒ष्य॒त् । अ॒प॒रा॒व॒पि॒ष्ठ॒मि॒त्य॒प॒रा – व॒पि॒ष्ठ॒म् । वर्ध॑मानम् ।
म॒हः॑ । ए॒ति॒ । च॒ । पु॒ष्क॒र॒म् । दि॒वः॑ । मा॒त्र॒या॒ । व॒रि॒णा॒ । प्र॒थ॒स्व॒ ।
श॒र्म॑ । च॒ । स्थः॑ । 10 (50)

4.1.3.2

व॒र्म॑ च॒ स्थो॑ अ॒च्छि॒द्रे॑ ब॒हु॒ले॑ उ॒भे॑ । व्य॒च॒स्व॒ती॒ सँव॑सा॒थां॒ भ॒र्त॒म॒ग्निं॑
पु॒री॒ष्यं॑ ॥ सं॒व॒सा॒था॒ सु॒व॒र्वि॒दा॒ स॒मी॒ची॒ उ॒र॒सा॒ त्म॒ना॑ ॥
अ॒ग्नि॒म॒न्त॑ भ॒रि॒ष्य॒न्ती॑ ज्यो॒ति॒ष्म॒न्त॑ म॒ज॒स्र॒मि॒त् ।
पु॒री॒ष्यो॒ऽसि॑ वि॒श्व॒भ॒राः॑ । अथ॒र्वा॒ त्वा॒ प्र॒थ॒मो॑ नि॒र॒म॒न्थ॒द॒ग्ने॑ ।
त्वा॒म॒ग्ने॑ पु॒ष्क॒रा॒द॒ध्य॒थ॒र्वा॑ नि॒र॒म॒न्थ॒त॑ । मू॒ध॒र्नो॑ वि॒श्व॒स्य॑ वा॒घ॒तः॑ ।
त॒मु॑ त्वा॒ द॒ध्य॒ङ् । ऋ॒षिः॑ पु॒त्र॒ ई॒धे॑ – [] 11

4.1.3.2 - Padam

व॒र्म॑ । च॒ । स्थः॑ । अ॒च्छि॑द्रे इति । ब॒हु॒ले॑ इति । उ॒भे॑ इति ।
व्य॒च॒स्व॒ती॑ इति । स॒मि॒ति॑ । व॒सा॒था॒म् । भ॒र्त॒म् । अ॒ग्नि॒म् । पु॒री॒ष्य॑म् ।
स॒मि॒ति॑ । व॒सा॒था॒म् । सु॒व॒र्वि॒दे॒ति॑ सु॒वः॑ – वि॒दा॑ । स॒मी॒ची॑ इति ।
उ॒र॒सा॑ । त्म॒ना॑ । अ॒ग्नि॒म् । अ॒न्तः॑ । भ॒रि॒ष्य॒न्ती॑ इति । ज्यो॒ति॒ष्म॒न्त॒म् ।
अ॒ज॒स्र॒म् । इ॒त् । पु॒री॒ष्यः॑ । अ॒सि॒ । वि॒श्व॒भ॒रा॑ इति वि॒श्व – भ॒राः॑ ।
अ॒थ॒र्वा॑ । त्वा॒ । प्र॒थ॒मः॑ । नि॒रि॒ति॑ । अ॒म॒न्थ॒त् । अ॒ग्ने॑ । त्वा॒म् ।
अ॒ग्ने॑ । पु॒ष्क॒रा॒त् । अ॒धी॒ति॑ । अ॒थ॒र्वा॑ । नि॒रि॒ति॑ । अ॒म॒न्थ॒त् । मू॒र्ध॒नः॑ ।
वि॒श्व॒स्य॑ । वा॒घ॒तः॑ । त॒म् । उ॒ । त्वा॒ । द॒ध्य॒ङ् । ऋ॒षिः॑ । पु॒त्रः॑ ।

ई॒धे॑ । 11 (50)

4.1.3.3

अ॒थ॒र्व॒णः॑ । वृ॒त्र॒ह॒णं॑ पु॒र॒न्द॒रं॑ । त॒मु॒ त्वा॒ पा॒थ्यो॑ वृ॒षा॒ स॒मी॒धे॑
द॒स्यु॒ह॒न्त॒मं॑ । ध॒न॒ञ्ज॒य॒ञ् र॒णो॒रणे॑ । सी॒द॒ हो॒तः॑ स्व॒ उ॒ लो॒के॑
चि॒कि॒त्वा॒न्थ् सा॒द॒या॒ य॒ज्ञ॒ञ् सु॒कृ॒त॒स्य॑ यो॒नौ॑ ।
दे॒वा॒वी॒र्दे॒वान् ह॒वि॒षा॒ य॒जा॒स्य॒ग्ने॑ बृ॒ह॒द्-य॒ज॒मा॒ने॑ व॒यो॒ धाः॑ ।

नि होता होतृषदने विदानस्त्वेषो दीदिवाꣳ असदत् सुदक्षः ।

अदब्धव्रत प्रमतिर्वसिष्ठः सहस्रं भरः शुचिजिह्वो अग्निः ।

सꣳ सीदस्व महाꣳ असि शोचस्व- [] 12

4.1.3.3 - Padam

अथर्वणः । वृत्रहणमिति वृत्र - हनम् । पुरन्दरमिति पुरं - दरम् ।

तम् । उ । त्वा । पाथ्यः । वृषा । समिति । ईधे । दस्युहन्तममिति

दस्यु-हन्तमम् । धनञ्जयमिति धनं - जयम् । रणोरण इति

रणे-रणे । सीद । होतः । स्वे । उ । लोके । चिकित्वान् । सादय ।

यज्ञम् । सुकृतस्येति सु-कृतस्य । योनौ । देवावीरिति देव-अवीः ।

देवान् । हविषा । यजासि । अग्ने । बृहत् । यजमाने । वयः । धाः ।

नीति । होता । होतृषदन इति होतृ - सदने । विदानः । त्वेषः ।

दीदिवान् । असदत् । सुदक्ष इति सु - दक्षः । अदब्धव्रत

प्रमतिरित्यदब्धव्रत-प्रमतिः । वसिष्ठः । सहस्रंभर इति सहस्रं-भरः ।

शुचिजिह्व॑ इति॑ शुचि॑ – जिह्वः॑ । अ॒ग्निः । समि॑ति । सीद॑स्व ।

म॒हान् । अ॒सि । शोच॑स्व । 12 (50)

4.1.3.4

दे॒ववी॑तमः । वि धू॒मम॑ग्ने अरु॒षं मि॑ये॒ध्य सृ॒ज प्र॑शस्त दर्श॑तं ।

जनि॑ष्वा हि जे॒न्यो अ॒ग्रे अ॒ह्नाँ॑ हि॒तो हि॑तेष्वरु॒षो वने॑षु ।

दमे॑दमे स॒प्त रत्ना॑ दधा॒नोऽग्नि॑र्हो॒ता नि ष॑सादा यजी॑यान् । 13

4.1.3.4 - Padam

दे॒ववी॑तम इति॑ दे॒व – वी॑तमः । वी॒ति । धू॒मम् । अ॒ग्ने । अरु॒षम् ।

मि॑ये॒ध्य । सृ॒ज । प्र॑शस्तेति॑ प्र – शस्त । दर्श॑तम् । जनि॑ष्वा । हि ।

जे॒न्यः । अ॒ग्रे । अ॒ह्नाम् । हि॒तः । हि॑तेषु । अरु॒षः । वने॑षु । दमे॑दम

इति॑ दमे॑ – दमे॑ । स॒प्त । रत्ना॑ । दधा॒नः । अ॒ग्निः । हो॒ता । नी॒ति ।

ससा॑दा । यजी॑यान् । 13 (27) (स्थ – ई॒धे – शोच॑स्व –

सप्त॑विंशतिश्च) – (A3)

4.1.4.1

सं ते वा॒युर्मा॑तरिश्वा दधा॒तूत्ता॑नायै हृद॑यं यद्वि॒लिष्टं॑ ।

दे॒वानां॑ य॒श्चर॑ति प्रा॒णथे॑न तस्मै॑ च दे॒वि वष॑डस्तु तुभ्यं॑ ।

सुजा॑तो॒ ज्यो॑तिषा॒ सह॒ शर्म॑ वरू॒थमा॑ऽसदः॒ सुवः॑ ।

वासो॑ अग्ने॒ विश्व॑रूप॒ऽसँव्य॑यस्व॒ विभाव॑सो ।

उदु॑ तिष्ठ॒ स्वध्व॑रावा॒ नो दे॒व्या कृ॒पा ।

दृ॒शो च॑ भा॒सा बृ॒हता॑ सु॒शुक्व॑नि॒राऽग्ने॑ याहि॒ सुश॑स्तिभिः । 14

4.1.4.1 - Padam

समि॑ति । ते । वा॒युः । मा॒तरि॑श्वा॒ ॥ द॒धातु॑ । उ॒त्ता॒नाया॑ इत्युत् –
ता॒नायै॑ ॥ हृद॑यम् । यत् । वि॒लि॒ष्टमि॑ति वि – लि॒ष्टम् । दे॒वाना॑म् । यः ।
च॒रति॑ । प्रा॒णथे॑नेति॒ प्र – अ॒नथे॑न । तस्मै॑ ॥ च । दे॒वि । व॒षट् ।
अ॒स्तु । तु॒भ्यम् ॥ सुजा॑त इति सु-जा॒तः । ज्यो॑तिषा । सह॒ शर्म॑ ।
वरू॒थम् । एति॑ । अ॒सदः॑ । सुवः॑ । वासः॑ । अग्ने॑ । विश्व॑रूपमि॑ति
वि॒श्व – रू॒पम् । समि॑ति । व्य॒यस्व॑ । वि॒भाव॑सो इति विभा-व॒सो ।
उदि॑ति । उ । तिष्ठ॒ । स्वध्व॑रेति सु – अध्व॒र । अव॑ । नः । दे॒व्या ।
कृ॒पा । दृ॒शो । च । भा॒सा । बृ॒हता॑ । सु॒शुक्व॑नि॒रिति॑ सु-शुक्व॒निः ।
एति॑ । अग्ने॑ । याहि॑ । सु॒श॒स्तिभि॑रिति सुश॒स्ति – भिः । 14 (50)

4.1.4.2

ऊ॒र्ध्व ऊ॒ षु॒ ण॒ ऊ॒तये॑ ति॒ष्ठा दे॒वो न॑ स॒विता॑ ।
ऊ॒र्ध्वो वा॒जस्य॑ स॒निता॑ यद॒ज्जिभि॑-र्वा॒घद्भि॑-र्वि॒ह्वया॑महे ।
स जा॒तो गर्भो॑ अ॒सि रो॒दस्यो॑र॒ग्ने चारु॑र्विभृ॒त ओष॑धीषु ।
चि॒त्रः शि॒शुः परि॑ तमा॒स्यक्तः॑ प्र मा॒तृभ्यो॑ अधि॒ कनि॑क्रद॒द्राः ।
स्थि॒रो भव॑ वी॒ड्वङ्ग॑ आ॒शुर्भव॑ वा॒ज्यर्वन् ।
पृ॒थुर्भव॑ सु॒षद॑स्त्वम॒ग्नेः पु॒रीष॑वा॒हनः॑ । शि॒वो भव॑ - [] 15

4.1.4.2 - Padam

ऊ॒र्ध्वः । उ॒ । स्वि॒ति । नः॑ । ऊ॒तये॑ । ति॒ष्ठ । दे॒वः । न॑ । स॒विता॑ ।
ऊ॒र्ध्वः । वा॒जस्य॑ । स॒निता॑ । यत् । अ॒ज्जिभि॑रि॒त्यज्जि॑ - भिः ।
वा॒घद्भि॑रि॒ति वा॒घत् - भिः॑ । वि॒ह्वया॑मह इति वि - ह्वया॑महे । सः ।
जा॒तः । गर्भः॑ । अ॒सि । रो॒दस्योः॑ । अ॒ग्ने । चारुः॑ । विभृ॒त इति॑
वि - भृ॒तः । ओष॑धीषु । चि॒त्रः । शि॒शुः । परि॑ति । तमा॒सी ।
अ॒क्तः । प्रे॒ति । मा॒तृभ्य॑ इति मा॒तृ - भ्यः॑ । अधि॑ति । कनि॑क्रदत् ।
गाः । स्थि॒रः । भव॑ । वी॒ड्वङ्ग॑ इति वी॒डु - अ॒ङ्गः । आ॒शुः । भव॑ ।

वा॒जी । अ॒र्वन् । पृ॒थुः । भ॒व । सु॒षद॒ इति॑ सु – सदः॑ । त्वम् ।
अ॒ग्नेः । पु॒री॒षवा॒हन॒ इति॑ पु॒रीष॑ – वा॒हनः॑ । शि॒वः । भ॒व । 15 (50)

4.1.4.3

प्र॒जाभ्यो॑ मा॒नु॒षी॒भ्यस्त्वम॑ङ्गि॒रः ।
मा द्या॒वापृ॑थि॒वी अ॒भि शू॒शुचो॑ मा॒ऽन्तरि॑क्षं मा वन॒स्पती॑न् ।
प्रै॒तु वा॒जी क॒निक्र॑द-न्ना॒नद॑द्-रा॒सभः॑ प॒त्वा ॥
भ॒रन् अ॒ग्निं पु॒री॒ष्यं मा पा॒द्यायु॑षः पु॒रा ।
रा॒सभो॑ वां क॒निक्र॑दथ् सु॒युक्तो॑ वृष॒णा रथे॑ ॥
स वा॒म॒ग्निं पु॒री॒ष्यमा॑शु॒र्दूतो॑ वहा॒दितः॑ ।
वृषा॑ऽग्निं वृ॒षणं॑ भ॒रन्ना॑पां गर्भ॑ऽस॒मुद्रि॑यं । अ॒ग्न आ या॑हि- [] 16

4.1.4.3 - Padam

प्र॒जाभ्य॑ इति॑ प्र – जा॒भ्यः । मा॒नु॒षी॒भ्यः । त्वम् । अ॒ङ्गि॒रः । मा ।
द्या॒वापृ॑थि॒वी इति॑ द्या॒वा – पृ॒थि॒वी । अ॒भीति॑ । शू॒शुचः॑ । मा ।
अ॒न्तरि॑क्षम् । मा । वन॒स्पती॑न् । प्रै॒ति । ए॒तु । वा॒जी । क॒निक्र॑दत् ।
ना॒नद॑त् । रा॒सभः॑ । प॒त्वा । भ॒रन् । अ॒ग्निम् । पु॒री॒ष्यम् । मा । पा॒दि ।

आ॒यु॒षः । पु॒रा । रा॒स॒भः । वा॒म् । क॒नि॒क्र॒दत् । सु॒यु॒क्त॒ इति॒
सु – यु॒क्तः । वृ॒ष॒णा । रथे॑ । सः । वा॒म् । अ॒ग्नि॒म् । पु॒री॒ष्य॒म् ।
आ॒शुः । दू॒तः । व॒हात् । इ॒तः । वृ॒षा । अ॒ग्नि॒म् । वृ॒ष॒ण॒म् । भ॒र॒न् ।
अ॒पा॒म् । गर्भ॑म् । स॒मु॒द्रि॒य॒म् । अ॒ग्ने॑ । ए॒ति॒ । या॒हि॒ । 16 (50)

4.1.4.4

वी॒त॒य॒ ऋ॒त॒ꣳ स॒त्यं । ओष॑ध॒यः॒ प्र॒ति॒ गृ॒ह्णी॒ताऽग्नि॑मे॒त॒ꣳ
शि॒व॒मा॒य॒न्त॒म॒भ्य॒त्र यु॒ष्मान् । व्य॒स्य॒न् वि॒श्वा॒ अ॒म॒ती॒र॒रा॒ती-नि॒षी॒द॒न्त्रो
अ॒प॒ दु॒र्म॒ति॒ꣳ ह॒नत् । ओष॑ध॒यः॒ प्र॒ति॒ मो॒द॒ध्व॒मे॒नं पु॒ष्पा॒व॒तीः
सु॒पि॒प्प॒लाः । अ॒यं वो॑ गर्भ॑ ऋ॒त्वि॒यः॒ प्र॒त्न॒ꣳ स॒ध॒स्थ॒मा ऽस॑दत् । 17

4.1.4.4 - Padam

वी॒त॒ये॑ । ऋ॒त॒म् । स॒त्य॒म् । ओष॑ध॒यः॒ । प्र॒ती॒ति॒ । गृ॒ह्णी॒त॒ । अ॒ग्नि॒म् ।
ए॒त॒म् । शि॒व॒म् । आ॒य॒न्त॒मि॒त्या॑ – य॒न्त॒म् । अ॒भी॒ति॒ । अ॒त्र॒ । यु॒ष्मान् ।
व्य॒स्य॒न्निति॑ वि – अ॒स्य॒न् । वि॒श्वाः॑ । अ॒म॒तीः॑ । अ॒रा॒तीः॑ ।
नि॒षी॒द॒न्नि॑ ति॒ नि – सी॒द॒न् । नः॑ । अ॒पे॒ति॒ । दु॒र्म॒ति॒मि॒ति॑ दुः- म॒ति॒म् ।
ह॒नत् । ओष॑ध॒यः॒ । प्र॒ती॒ति॒ । मो॒द॒ध्व॒म् । ए॒न॒म् ।

पुष्पा॑वती॒रिति॑ पु॒ष्प – वतीः॑ । सु॒पि॒प्पला॑ इति॑ सु – पि॒प्पलाः॑ ।
अयम् । वः । गर्भः॑ । ऋ॒त्वि॒यः । प्र॒त्नम् । स॒धस्थ॑मिति॑ स॒ध-स्थम् ।
एति॑ । अ॒सदत् । 17 (36) (सु॒श॒स्तिभिः॑ – शि॒वो भव॑ – याहि॑ –
षट्त्रिं॑शच्च) (A4)

4.1.5.1

वि पाजसा॑ पृ॒थुना॑ शो॒शु॒चानो॑ बा॒धस्व॑ द्वि॒षो रक्ष॑सो अमी॒वाः ।
सु॒शर्म॑णो बृ॒हतः॑ शर्म॑णि स्याम॒ग्नेरह॑ सु॒हव॑स्य प्रणी॒तौ ।
आपो॑ हि ष्ठा म॒योभु॒वस्ता॑ न ऊ॒र्जे दधा॑तन । महे॑ रणा॒य चक्ष॑से ।
यो वः॑ शि॒वत॑मो र॒सस्त॑स्य भाज॒यते॑ह नः । उ॒शती॑रिव मा॒तरः॑ ।
तस्मा॑ अ॒रं ग॒माम॑ वो॒ यस्य॑ क्षया॒य जि॒न्वथ॑ । आपो॑ ज॒नय॑था च नः ।

मित्रः – [] 18

4.1.5.1 - Padam

वीति॑ । पाजसा॑ । पृ॒थुना॑ ॥ शो॒शु॒चानः॑ । बा॒धस्व॑ । द्वि॒षः । रक्ष॑सः ।
अमी॒वाः । सु॒शर्म॑ण इति॑ सु – शर्म॑णः । बृ॒हतः॑ । शर्म॑णि । स्याम् ।
अ॒ग्नेः । अ॒हम् । सु॒हव॑स्येति॑ सु-हव॑स्य । प्रणी॒तावि॑ति॒ प्र – नी॒तौ ।

आपः । हि । स्थ । मयो॑भुव॒ इति॑ मयः-भुवः । ताः । नः । ऊ॒र्जे ।
दधा॑तन । महे॑ । रणा॑य । चक्ष॑से । यः । वः । शिव॑तम॒ इति॑
शिव॑-तमः । रसः । तस्य॑ । भाज॑यत । इह । नः । उ॒शतीः । इव ।
मा॒तरः । तस्मै॑ । अ॒रम् । ग॒माम॑ । वः । यस्य॑ । क्षया॑य । जि॒न्वथ॑ ।
आपः । ज॒नय॑थ । च । नः । मि॒त्रः । 18 (50)

4.1.5.2

स॒ꣳसृ॑ज्य पृथि॒वीं भू॑मिं च ज्योति॑षा सह ।
सुजा॑तं जा॒तवे॑दसम॒ग्निं वै॑श्वा॒नरं॑ वि॒भुं ।
अ॒यक्ष्मा॑य त्वा स॒ꣳसृ॑जामि प्र॒जाभ्यः॑ ।
वि॒श्वे॑ त्वा दे॒वा वै॑श्वा॒नराः॑ स॒ꣳसृ॑जन्त्वा-नु॒ष्टुभे॑न छ॒न्दसा॑ऽङ्गि॒रस्वत्॑ ।
रु॒द्राः सं॒भृत्य॑ पृथि॒वीं बृ॒हज्ज्यो॑तिः समी॒धिरे॑ ।
तेषां॑ भा॒नुर॑जस्र इच्छु॒क्रो दे॒वेषु॑ रोच॑ते । स॒ꣳसृ॑ष्टां वसु॑भी रु॒द्रैर्धी॑रैः
क॒र्म॒ण्यां मृ॑दं । ह॒स्ताभ्यां॑ मृ॒द्धीं कृ॑त्वा सि॒नीवा॒ली करो॑तु - [] 19

4.1.5.2 - Padam

स॒ञ्सृ॒ज्येति॑ सं – सृ॒ज्य॑ । पृ॒थि॒वीम् । भू॒मिम् । च॒ । ज्योति॑षा ।
सह॑ । सुजा॑तमिति॒ सु – जा॒तम् । जा॒तवे॑दसमिति॒ जा॒त – वे॒दस॒म् ।
अ॒ग्निम् । वै॒श्वान॒रम् । वि॒भुमि॑ति वि – भुम् । अ॒यक्ष्मा॑य । त्वा ।
समि॑ति । सृ॒जामि॑ । प्र॒जाभ्य॑ इति॒ प्र-जा॑भ्यः । वि॒श्वे॑ । त्वा । दे॒वाः ।
वै॒श्वान॒राः । समि॑ति । सृ॒जन्तु॑ । आ॒नुष्टु॑भेनेत्या॒नु-स्तु॑भेन॒ । छन्द॑सा ।
अ॒ङ्गिर॑स्वत् । रु॒द्राः । संभृ॑त्येति॒ सं – भृ॑त्य । पृ॒थि॒वीम् । बृ॒हत् ।
ज्योतिः॑ । समि॑ति । ई॒धिरे॑ । तेषा॑म् । भा॒नुः । अ॒जस्रः॑ । इत् ।
शु॒क्रः । दे॒वेषु॑ । रो॒चते॑ । स॒ञ्सृ॒ष्टामि॑ति सं – सृ॒ष्टाम् । वसु॑भिरिति॒
वसु॑ – भिः । रु॒द्रैः । धी॒रैः । क॒र्म॒ण्याम्॑ । मृ॒दम् । ह॒स्ताभ्या॑म् ।
मृ॒द्धीम् । कृ॒त्वा । सि॒नीवा॒ली । क॒रोतु॑ । 19 (50)

4.1.5.3

तां । सि॒नीवा॒ली सु॑कपर्दा सु॑कुरीरा स्वौप॒शा ।
सा तु॑भ्यमदि॒ते मह॑ ओ॒खां दधा॑तु ह॒स्तयोः॑ ।
उ॒खां क॒रोतु॑ श॒क्त्या बा॒हुभ्या॑-मदि॒तिर्धिया॑ ।

मा॒ता पु॒त्रं य॑थोप॒स्थे सा॒ऽग्निं बि॑भर्तु॒ गर्भ॑ आ ।
म॒खस्य॑ शिरो॒ऽसि य॒ज्ञस्य॑ पदे॒ स्थः । वस॑वस्त्वा कृ॒ण्वन्तु॑ गाय॒त्रेण॑
छ॒न्दसा॑ ऽङ्गि॒रस्वत् पृ॑थि॒व्यसि॑ रु॒द्रास्त्वा कृ॒ण्वन्तु॑ त्रैष्टु॒भेन॑ छ॒न्दसा॑
ऽङ्गि॒रस्वद॑न्तरि॒क्षम॑स्या – [] 20

4.1.5.3 - Padam

ताम् । सि॒नीवा॒ली । सु॒कपर्दे॑ति सु – क॒पर्दा । सु॒कुरी॑रेति॑
सु – कु॒रीरा । स्वौप॑शेति सु – औप॒शा । सा । तु॒भ्यम् । अ॒दिते॑ ।
महे॑ । ए॒ति । उ॒खाम् । द॒धातु॑ । ह॒स्तयोः॑ । उ॒खाम् । क॒रोतु॑ ।
श॒क्त्या॑ । बा॒हुभ्या॑मिति॑ बा॒हु – भ्याम् । अ॒दितिः॑ । धि॒या । मा॒ता ।
पु॒त्रम् । यथा॑ । उ॒पस्थ॑ इत्यु॒प-स्थे॑ । सा । अ॒ग्निम् । बि॒भर्तु॑ । गर्भे॑ ।
आ । म॒खस्य॑ । शि॒रः । अ॒सि । य॒ज्ञस्य॑ । पदे॑ इति॑ । स्थः ।
वस॑वः । त्वा । कृ॒ण्वन्तु॑ । गाय॒त्रेण॑ । छ॒न्दसा॑ । अ॒ङ्गि॒रस्वत् ।
पृ॒थि॒वी । अ॒सि । रु॒द्राः । त्वा । कृ॒ण्वन्तु॑ । त्रैष्टु॒भेन॑ । छ॒न्दसा॑ ।
अ॒ङ्गि॒रस्वत् । अ॒न्तरि॑क्षम् । अ॒सि । 20 (50)

4.1.5.4

–दित्यास्त्वा कृण्वन्तु जागतेन छन्दसाऽङ्गिरस्वद् द्यौरसि विश्वे
त्वा देवा वैश्वानराः कृण्वन्त्वानुष्टुभेन छन्दसा–ऽङ्गिरस्वद्–दिशोऽसि
ध्रुवाऽसि धारया मयि प्रजाꣳ रायस्पोषं गौपत्यꣳ सुवीर्यꣳ सजातान्
यजमानायाऽदित्यै रास्नाऽस्य दितिस्ते बिलं गृह्णातु पाङ्केन
छन्दसा ऽङ्गिरस्वत् । कृत्वाय सा महीमुखां मृन्मयीं योनिमग्नये ॥
तां पुत्रेभ्यः सं प्रा () यच्छददितिः श्रपयानिति । 21

4.1.5.4 - Padam

आदित्याः । त्वा । कृण्वन्तु । जागतेन । छन्दसा । अङ्गिरस्वत् ।
द्यौः । असि । विश्वे ॥ त्वा । देवाः । वैश्वानराः । कृण्वन्तु ।
आनुष्टुभेनेत्यानु – स्तुभेन । छन्दसा । अङ्गिरस्वत् । दिशः । असि ।
ध्रुवा । असि । धारय । मयि । प्रजामिति प्र–जाम् । रायः । पोषम् ॥
गौपत्यम् । सुवीर्यमिति सु – वीर्यम् ॥ सजातानिति स – जातान् ।
यजमानाय । अदित्यै ॥ रास्ना । असि । अदितिः । ते । बिलम् ॥
गृह्णातु । पाङ्केन । छन्दसा । अङ्गिरस्वत् । कृत्वाय । सा । महीम् ।

उ॒खाम् । मृ॒न्मयी॑मि॒ति मृ॒त्-मयी॑म् । यो॒निम् । अ॒ग्नये॑ । ताम् ।
पु॒त्रेभ्यः॑ । सम् । प्रे॒ति () । अ॒यच्छ॑त् । अ॒दि॒तिः । श्र॒पयान् ।
इति॑ । 21 (54)

(मि॒त्रः – क॑रो – त्व॒न्तरि॑क्षम॒सि – प्र – च॒त्वारि॑ च) (A5)

4.1.6.1

वस॑वस्त्वा धू॒पयन्तु॑ गा॒यत्रे॑ण छ॒न्दसा॑ऽङ्गि॒रस्वद्-रु॒द्रास्त्वा धू॒पयन्तु॑
त्रै॒ष्टुभे॑न छ॒न्दसा॑ऽङ्गि॒रस्व-दा॑दि॒त्यास्त्वा धू॒पयन्तु॑ जा॒गते॑न
छ॒न्दसा॑ऽङ्गि॒रस्वद्-वि॒श्वे॑ त्वा दे॒वा वै॒श्वान॑रा धू॒पयन्त्वा॑नु॒ष्टुभे॑न
छ॒न्दसा॑ऽङ्गि॒रस्व-दि॒न्द्रस्त्वा धू॒पय॑त्व॒ङ्गि॒रस्वद्-वि॒ष्णुस्त्वा
धू॒पय॑त्व॒ङ्गि॒रस्वद्-व॑रु॒णस्त्वा धू॒पय॑त्व॒ङ्गि॒रस्व-दा॑दि॒तिस्त्वा दे॒वी
वि॒श्वदे॑व्यावती पृ॒थिव्याः॑ स॒धस्थे॑ऽङ्गि॒रस्वत् ख॑न॒त्वव॑ट दे॒वानां॑ त्वा
पत्नी॑ – [] 22

4.1.6.1 - Padam

वस॑वः । त्वा । धू॒पयन्तु॑ । गा॒यत्रे॑ण । छ॒न्दसा॑ । अ॒ङ्गि॒रस्वत् ।
रु॒द्राः । त्वा । धू॒पयन्तु॑ । त्रै॒ष्टुभे॑न । छ॒न्दसा॑ । अ॒ङ्गि॒रस्वत् ।

आ॒दि॒त्याः । त्वा । धू॒प॒य॒न्तु । जा॒ग॒ते॒न । छ॒न्द॒सा । अ॒ङ्गि॒र॒स्व॒त् ।
वि॒श्वे॑ ॥ त्वा । दे॒वाः । वै॒श्वान॒राः । धू॒प॒य॒न्तु ।
आ॒नु॒ष्टु॒भे॒ने॒त्यानु॑ – स्तु॒भे॒न । छ॒न्द॒सा । अ॒ङ्गि॒र॒स्व॒त् । इ॒न्द्रः॑ । त्वा ।
धू॒प॒य॒तु । अ॒ङ्गि॒र॒स्व॒त् । वि॒ष्णुः॑ । त्वा । धू॒प॒य॒तु । अ॒ङ्गि॒र॒स्व॒त् ।
व॒रु॒णः॑ । त्वा । धू॒प॒य॒तु । अ॒ङ्गि॒र॒स्व॒त् । अ॒दि॒तिः॑ । त्वा । दे॒वी ।
वि॒श्व॒दे॒व्या॒व॒ती॒ति॑ वि॒श्व॒दे॒व्य॑ – व॒ती । पृ॒थि॒व्याः । स॒ध॒स्थ॒ इति॑
स॒ध॒ – स्थे॑ ॥ अ॒ङ्गि॒र॒स्व॒त् । ख॒न॒तु । अ॒व॒ट । दे॒वा॒ना॒म् । त्वा ।
प॒त्नीः॑ ॥ 22 (50)

4.1.6.2

दे॒वी वि॒श्व॒ दे॒व्या॒व॒तीः॑ पृ॒थि॒व्याः॑ स॒ध॒स्थे॑ ऽङ्गि॒र॒स्व॒द्-द॒ध॒तू॒खे
धि॒ष॒णा॒स्त्वा॑ दे॒वी॒वि॒श्व॒दे॒व्या॒व॒तीः॑ पृ॒थि॒व्याः॑ स॒ध॒स्थे॑-ऽङ्गि॒र॒स्व॒-
द॒भी॒न्ध॒ता॒मु॒खे॑ ग॒ना॒स्त्वा॑ दे॒वी॒वि॒श्व॒दे॒व्या॒व॒तीः॑ पृ॒थि॒व्याः॑
स॒ध॒स्थे॑ ऽङ्गि॒र॒स्व॒-च्छ॒प॒य॒न्तू॒खे॑ व॒रू॒त्र॒यो॒ जन॑य॒स्त्वा
दे॒वी॒वि॒श्व॒दे॒व्या॒व॒तीः॑ पृ॒थि॒व्याः॑ स॒ध॒स्थे॑ ऽङ्गि॒र॒स्व॒त् प॒च॒न्तू॒खे॑ ।

मि॒त्रै॒तामु॒खां प॑चै॒षा मा॑ भे॒दि । ए॒तां ते॒ परि॑ द॒दाम्य॑भि॒त्त्यै ।

अ॒भी॒मां – [] 23

4.1.6.2 - Padam

दे॒वीः । वि॒श्व॑दे॒व्याव॑तीरि॒ति वि॒श्व॑दे॒व्य – व॒तीः । पृ॒थि॒व्याः । स॒ध॒स्थ
इति॑ स॒ध – स्थे॑ । अ॒ङ्गि॒र॒स्वत् । द॒धतु॑ । उ॒खे । धि॒षणाः॑ । त्वा ।
दे॒वीः । वि॒श्व॑दे॒व्याव॑तीरि॒ति वि॒श्व॑दे॒व्य – व॒तीः । पृ॒थि॒व्याः । स॒ध॒स्थ
इति॑ स॒ध – स्थे॑ । अ॒ङ्गि॒र॒स्वत् । अ॒भी॒ति । इ॒न्ध॒ताम् । उ॒खे । ग्नाः ।
त्वा । दे॒वीः । वि॒श्व॑दे॒व्याव॑तीरि॒ति वि॒श्व॑दे॒व्य – व॒तीः । पृ॒थि॒व्याः ।
स॒ध॒स्थ इति॑ स॒ध – स्थे॑ । अ॒ङ्गि॒र॒स्वत् । श्र॒प॒यन्तु॑ । उ॒खे ।
व॒रू॒त्र॒यः । ज॒न॒यः । त्वा । दे॒वीः । वि॒श्व॑दे॒व्याव॑तीरि॒ति
वि॒श्व॑दे॒व्य – व॒तीः । पृ॒थि॒व्याः । स॒ध॒स्थ इति॑ स॒ध – स्थे॑ ।
अ॒ङ्गि॒र॒स्वत् । प॒च॒न्तु॑ । उ॒खे । मि॒त्र । ए॒ताम् । उ॒खाम् । प॒च । ए॒षा ।
मा । भे॒दि । ए॒ताम् । ते॒ । प॒री॒ति । द॒दामि॑ । अ॒भि॒त्त्यै । अ॒भी॒ति ।
इ॒माम् । 23 (50)

4.1.6.3

महि॑ना दि॒वं मि॒त्रो ब॒भूव॑ सप्र॒थाः॑ । उ॒त श्रव॑सा पृथि॒वीं ।
मि॒त्रस्य॑ चर्ष॒णीधृ॑तः श्रवो॑ दे॒वस्य॑ सान॒सिं । द्यु॒म्नं चि॒त्रश्रव॑स्तमं ।
दे॒वस्त्वा स॒वितो॑द्वपतु सुपा॒णिः स्व॒ङ्गुरिः॑ । सु॒बा॒हु॒रुत॑ शक्त्या॑ ।
अप॑द्यमाना पृथि॒व्याशा॑ दि॒श आ पृ॑ण ।
उत्ति॑ष्ठ बृ॒हती॑ भवो॒र्ध्वा तिष्ठ॑ ध्रु॒वा त्वं । वस॑वस्त्वा ऽऽच्छृ॑न्दन्तु
गाय॑त्रेण छन्द॒साऽङ्गिर॑स्वद् रु॒द्रास्त्वाऽऽच्छृ॑न्दन्तु () त्रैष्टु॑भेन
छन्द॒साऽङ्गिर॑स्व-दादि॒त्यास्त्वा ऽऽच्छृ॑न्दन्तु जा॒गते॑न
छन्द॒साऽङ्गिर॑स्व-वि॒श्वे॑ त्वा दे॒वा वैश्वान॑रा आ च्छृ॑न्दन्त्वानुष्टु॒भेन॑
छन्द॒साऽङ्गिर॑स्वत् । 24

4.1.6.3 - Padam

महि॑ना । दि॒वम् । मि॒त्रः । ब॒भूव॑ । सप्र॒था इति॑ स – प्र॒थाः॑ । उ॒त ।
श्रव॑सा । पृथि॒वीम् । मि॒त्रस्य॑ । चर्ष॒णीधृ॑त इति॑ चर्ष॒णि – धृ॑तः ।
श्रवः॑ । दे॒वस्य॑ । सान॒सिम् । द्यु॒म्नम् । चि॒त्रश्रव॑स्तममि॒ति
चि॒त्रश्रवः॑ – तमम् । दे॒वः । त्वा । स॒विता॑ । उ॒दिति॑ । वप॒तु ।

सु॒पा॒णि॒रिति॑ सु – पा॒णिः । स्व॒ङ्गु॒रिति॑ सु – अ॒ङ्गु॒रिः । सु॒बा॒हु॒रिति॑
 सु – बा॒हुः । उ॒त । श॒क्त्या॑ । अ॒प॒द्य॒मा॒ना । पृ॒थि॒वि । आ॒शाः ।
 दि॒शः । ए॒ति । पृ॒ण । उ॒दि॒ति । तिष्ठ॑ । बृ॒हती॑ । भ॒व । ऊ॒र्ध्वा । तिष्ठ॑ ।
 ध्रु॒वा । त्वम् । व॒स॒वः । त्वा । ए॒ति । छृ॒न्द॒तु । गा॒य॒त्रेण॑ । छ॒न्द॒सा ।
 अ॒ङ्गि॒र॒स्वत् । रु॒द्राः । त्वा । ए॒ति । छृ॒न्द॒तु () । त्रै॒ष्टु॒भेन॑ । छ॒न्द॒सा ।
 अ॒ङ्गि॒र॒स्वत् । आ॒दि॒त्याः । त्वा । ए॒ति । छृ॒न्द॒तु । जा॒ग॒तेन॑ । छ॒न्द॒सा ।
 अ॒ङ्गि॒र॒स्वत् । वि॒श्वे॑ । त्वा । दे॒वाः । वै॒श्वान॑राः । ए॒ति । छृ॒न्द॒तु ।
 आ॒नु॒ष्टु॒भेने॑त्यानु – स्तु॒भेन॑ । छ॒न्द॒सा । अ॒ङ्गि॒र॒स्वत् । 24 (69)
 (प॒त्नी – रि॒माꣳ – रु॒द्रास्त्वाꣳ छृ॒न्द॒न्त्वे – का॒न्न विꣳश॑तिश्च)
 (A6)

4.1.7.1

स॒मा॒स्त्वाꣳग्न॑ ऋ॒त॒वो॑ वर्ध॒यन्तु॑ सँव॒त्स॒रा ऋ॒ष॒यो या॒नि स॒त्या ।
 सं दि॒व्येन॑ दी॒दि॒हि रो॒च॒नेन॑ वि॒श्वा आ॒ भा॒हि प्र॒दि॒शः पृ॒थि॒व्याः ।
 सं चे॒ध्य॒स्वाꣳग्ने॑ प्र च॒ बो॒ध॒यै॒नमु॒च्च॑ तिष्ठ॑ म॒ह॒ते सौ॒भ॒गाय॑ ।

मा च॑ रि॒षदु॒प॒स॒त्ता ते॑ अ॒ग्ने ब्र॒ह्माण॑स्ते॒ यश॑सः सन्तु॒ माऽन्ये॑ ।

त्वाम॑ग्ने वृणते ब्राह्म॑णा इ॒मे शि॒वो अ॒ग्ने – [] 25

4.1.7.1 - Padam

स॒माः । त्वा॒ । अ॒ग्ने । ऋ॒तवः॑ । वर्ध॑यन्तु । सँव॑त्सरा इति॑
सं-व॑त्सराः । ऋ॒षयः॑ । या॒नि । स॒त्या । स॒मि॒ति । दि॒व्येन॑ । दी॒दि॒हि ।
रो॒च॒नेन॑ । वि॒श्वाः । ए॒ति । भा॒हि । प्र॒दि॒श इति॑ प्र – दि॒शः ।
पृ॒थि॒व्याः । स॒मि॒ति । च॒ । इ॒ध्यस्व॑ । अ॒ग्ने । प्रे॒ति । च॒ । बो॒धय॑ ।
ए॒नम् । उ॒दि॒ति । च॒ । ति॒ष्ठ । म॒ह॒ते । सौ॒भ॒गाय॑ । मा । च॒ । रि॒षत् ।
उ॒प॒स॒त्तेत्यु॑प – स॒त्ता । ते॑ । अ॒ग्ने । ब्र॒ह्माणः॑ । ते॑ । य॒श॑सः । सन्तु॒ ।
मा । अ॒न्ये । त्वा॒म् । अ॒ग्ने । वृ॒ण॒ते । ब्रा॒ह्म॒णाः । इ॒मे । शि॒वः ।

अ॒ग्ने । 25 (50)

4.1.7.2

सं व॑रणो भ॒वा नः॑ । स॒प॒त्न॒हा नो॑ अ॒भि॒मा॒ति॒जि॒च्च स्वे॑ ग॒ये जा॒गृ॒ह्य
प्र॒यु॒च्छन् । इ॒है॒वा॒ग्ने अ॒धि धा॒रया॑ र॒यिं मा॒ त्वा नि॒क्रन् पूर्व॑चितो
नि॒का॒रि॒णः । क्ष॒त्र॒म॒ग्ने सु॒य॒म॒मस्तु॑ तु॒भ्यमु॑प॒स॒त्ता वर्ध॑तां ते॒ अनि॑ष्टतः ।

क्ष॒त्रेणा॒॑ग्ने स्वा॒युः स॒ र॒भ॒स्व मि॒त्रेणा॒॑ग्ने मि॒त्र॒धेये॑ य॒तस्व॑ ।
स॒जा॒तानां॑ म॒ध्यम॑स्था ए॒धि रा॒ज्ञाम॑ग्ने वि॒हव्यो॑ दी॒दिही॑ह ।

अति – [] 26

4.1.7.2 - Padam

सँ॑वर॒ण इति॑ सं – वर॑णे । भ॒व । नः॑ । स॒प॒त्न॒हेति॑ स॒प॒त्न॒-हा । नः॑ ।
अ॒भि॒मा॒ति॒जि॒दि॒त्य॒भि॒मा॒ति – जि॒त् । च॒ । स्वे॑ । ग॒ये॑ । जा॒गृ॒हि ।
अ॒प्र॒यु॒च्छ॒न्नित्य॑प्र – यु॒च्छ॒न् । इ॒ह । ए॒व । अ॒ग्ने । अ॒धी॒ति । धा॒र॒य ।
र॒यि॒म् । मा॒ । त्वा॒ । नी॒ति । क्र॒न् । पू॒र्व॒चि॒त इति॑ पू॒र्व – चि॒तः॑ ।
नि॒का॒रि॒ण इति॑ नि – का॒रि॒णः॑ । क्ष॒त्र॒म् । अ॒ग्ने । सु॒य॒म॒मि॒ति॑
सु – य॒म॒म् । अ॒स्तु॒ । तु॒भ्य॒म् । उ॒प॒स॒त्तेत्यु॑प-स॒त्ता । व॒र्ध॒ता॒म् । ते॒ ।
अ॒नि॒ष्टृ॒तः॑ । क्ष॒त्रे॒ण । अ॒ग्ने । स्वा॒यु॒रि॒ति सु – आ॒युः॑ । स॒मि॒ति॑ ।
र॒भ॒स्व । मि॒त्रे॒ण । अ॒ग्ने । मि॒त्र॒धे॒य इति॑ मि॒त्र – धे॒ये॑ । य॒तस्व॑ ।
स॒जा॒ताना॑मि॒ति स – जा॒ताना॑म् । म॒ध्यम॑स्था इति॑ म॒ध्यम॑ – स्थाः॑ ।

ए॒धि । रा॒ज्ञाम् । अ॒ग्ने । वि॒हव्य॑ इति॑ वि – ह॒व्यः । दी॒दि॒हि । इ॒ह ।
अती॑ति । 26 (50)

4.1.7.3

नि॒हो अति॑ सि॒धो ऽत्य॑चित्ति-म॒त्यरा॑तिम॒ग्ने ।
वि॒श्वा ह्य॒ग्ने दु॒रिता॑ सह॒स्वाथा॑स्मभ्य॑ꣳ सह॒वीराꣳ रयि॑न्दाः ।
अ॒नाधृ॑ष्यो जा॒तवे॑दा अ॒निष्टृ॑तो वि॒राड॑ग्ने क्ष॒त्रभृ॑द्-दी॒दि॒हीह ।
वि॒श्वा आ॒शाः प्र॒मुञ्च॑न् मा॒नुषी॑र्भियः शि॒वाभि॑र॒द्य परि॑ पा॒हि नो॑ वृ॒धे ।
बृ॒हस्प॑ते स॒वित॑र्बो॒धयै॑न्ꣳ सꣳशि॑तं चि॒त्सं त॒राꣳ सꣳ शि॑शाधि ।
व॒र्धयै॑नं म॒हते॑ सौ॒भगा॑य- [] 27

4.1.7.3 - Padam

नि॒हः । अती॑ति । सि॒धः । अती॑ति । अ॒चित्ति॑म् । अती॑ति । अ॒राति॑म् ।
अ॒ग्ने । वि॒श्वा । हि । अ॒ग्ने । दु॒रिते॑ति दुः – इ॒ता । सह॑स्व ।
अथ॑ । अ॒स्मभ्य॑मि॒त्यस्म॑ – भ्य॒म् । सह॑वी॒रामि॑ति सह – वी॒राम् ।
रयि॑म् । दाः । अ॒नाधृ॑ष्य इत्य॑ना – धृ॒ष्यः । जा॒तवे॑दा इति॑
जा॒त – वे॒दाः । अ॒निष्टृ॑तः । वि॒राडि॑ति वि – राट् । अ॒ग्ने ।

क्ष॒त्र॒भृ॒दिति॑ क्ष॒त्र – भृ॒त् । दी॒दि॒हि । इ॒ह । वि॒श्वाः॑ । आ॒शाः॑ ।
प्र॒मु॒ञ्च॒न्निति॑ प्र – मु॒ञ्च॒न् । मा॒नु॒षीः । भि॒यः । शि॒वाभिः॑ । अ॒द्य ।
परी॑ति । पा॒हि । नः । वृ॒धे । बृ॒ह॒स्प॒ते । स॒वि॒तः । बो॒ध॒य । ए॒नम् ।
सञ्शित॑मिति सं – शि॒तम् । चि॒त् । सं॒तरा॑मिति सं – त॒राम् ।
स॒मि॒ति । शि॒शा॒धि । वर्ध॑य । ए॒नम् । म॒ह॒ते । सौ॒भ॒गाय॑ । 27 (50)

4.1.7.4

वि॒श्व ए॒न॒म॒नु॒ म॒द॒न्तु॑ दे॒वाः । अ॒मु॒त्र॒भू॒या॒द॒ध॒ य॒द्य॒म॒स्य॑ बृ॒ह॒स्प॒ते
अ॒भि॒श॒स्ते॒र॒ मु॒ञ्चः॑ । प्र॒त्यौ॒ह॒ता-म॒श्वि॒ना मृ॒त्यु॒म॒स्माद् दे॒वा॒ना-म॒ग्ने
भि॒ष॒जा श॒ची॒भिः॑ । उ॒द्व॒यं त॒म॒स॒स्परि॑ प॒श्य॒न्तो॒ ज्योति॑रु॒त्तरं॑ ।
दे॒वं दे॒व॒त्रा सूर्य॑म॒ग॒न्म॒ ज्योति॑रु॒त्त॒मं । 28

4.1.7.4 - Padam

वि॒श्वे॑ । ए॒नम् । अ॒न्वि॒ति । म॒द॒न्तु॑ । दे॒वाः ।
अ॒मु॒त्र॒भू॒या॒दि॒त्य॒मु॒त्र – भू॒या॒त् । अ॒ध॒ । य॒त् । य॒म॒स्य॑ । बृ॒ह॒स्प॒ते ।
अ॒भि॒श॒स्ते॒रि॒त्य॒भि – श॒स्तेः॑ । अ॒मु॒ञ्चः॑ । प्र॒ती॒ति । औ॒ह॒ता॒म् ।
अ॒श्वि॒ना । मृ॒त्यु॒म् । अ॒स्मा॒त् । दे॒वा॒ना॒म् । अ॒ग्ने॑ । भि॒ष॒जा ।

शची॑भिरिति॑ शचि॑ – भिः॑ । उदि॑ति । वय॑म् । तम॑सः । परी॑ति ।

पश्य॑न्तः । ज्यो॑तिः । उत्तर॑मित्युत् – तर॑म् । देव॑म् ।

देव॑त्रेति॑ देव – त्रा । सूर्य॑म् । अग॑न्म । ज्यो॑तिः ।

उत्त॑ममित्युत् – तम॑म् । 28 (34) (इ॒मे शि॒वो अ॒ग्ने – ऽति –

सौ॒भगा॒य – चतु॑स्त्रि॒ंशच्च) (A7)

4.1.8.1

ऊ॒र्ध्वा अ॒स्य स॒मिधो॑ भव॑न्त्यू॒र्ध्वा शु॒क्रा शो॒ची॒ऽष्य॒ग्नेः ।

द्यु॒मत्त॑मा सु॒प्रती॒कस्य॑ सू॒नोः । तनू॑नपा॒दसुरो॑ वि॒श्ववे॑दा दे॒वो दे॒वेषु॑

दे॒वः । पथ॑ आ॒ऽनक्ति॑ म॒ध्वा घृ॑तेन । म॒ध्वा य॒ज्ञं न॑क्ष॒से प्री॑णानो

नरा॑श॒ऽसौ अ॒ग्ने । सु॒कृ॒द्दे॒वः स॒विता॑ वि॒श्ववा॑रः । अ॒च्छाय॑मेति

शव॑सा घृ॒तेने॑डा॒नो वह्नि॑र्नम॒सा । अ॒ग्नि॒ऽसु॒चो अ॒ध्वरे॑षु प्र॒यथ्सु॑ ।

स य॑क्षदस्य म॒हिमा॑नम॒ग्नेः स – [] 29

4.1.8.1 - Padam

ऊ॒र्ध्वाः । अ॒स्य । स॒मिध॑ इति॑ सं-इ॒धः । भव॑न्ति । ऊ॒र्ध्वा । शु॒क्रा ।

शो॒ची॒ऽषि॑ । अ॒ग्नेः । द्यु॒मत्त॑मेति॑ द्यु॒मत् – त॒मा ।

सु॒प्र॒ती॒क॒स्ये॒ति सु॒ – प्र॒ती॒क॒स्य॒ । सू॒नोः॒ । त॒नू॒न॒पा॒दि॒ति त॒नू॒-न॒पा॒त् ॥
 अ॒सु॒रः॒ । वि॒श्व॒वे॒दा इति॑ वि॒श्व-वे॒दाः॒ । दे॒वः॒ । दे॒वेषु॑ । दे॒वः॒ । प॒थः॒ ।
 ए॒ति॒ । अ॒न॒क्ति॒ ॥ म॒ध्वा॒ ॥ घृ॒तेन॑ । म॒ध्वा॒ ॥ य॒ज्ञम् । न॒क्ष॒से॒ । प्री॒णा॒नः॒ ।
 न॒रा॒श॒सः॒ । अ॒ग्ने॒ । सु॒कृ॒दि॒ति सु॒ – कृ॒त् । दे॒वः॒ । स॒वि॒ता ।
 वि॒श्व॒वा॒र इति॑ वि॒श्व – वा॒रः॒ । अ॒च्छ॒ । अ॒यम् । ए॒ति॒ । श॒व॒सा ।
 घृ॒तेन॑ । ई॒डा॒नः॒ । व॒हिः॒ । न॒म॒सा । अ॒ग्नि॒म् । सु॒चः॒ । अ॒ध्व॒रेषु॑ ।
 प्र॒य॒त्स्वि॒ति प्र॒यत् – सु॒ । सः॒ । य॒क्ष॒त् । अ॒स्य॒ । म॒हि॒मा॒नम् ॥

अ॒ग्नेः॒ । सः॒ । 29 (50)

4.1.8.2

ई॒ म॒न्द्रा॒सु प्र॒य॒सः॒ । व॒सु॒श्चे॒ति॒ष्ठो व॒सु॒धा॒त॒मश्च॑ ।
 द्वा॒रो दे॒वी॒र॒न्व॒स्य वि॒श्वे॑ व्र॒ता द॒द॒न्ते॑ अ॒ग्नेः॒ । उ॒रु॒व्य॒च॒सो धा॒म्ना
 प॒त्य॒मा॒नाः॒ । ते॒ अ॒स्य॒ योष॑णे दि॒व्ये न॒ यो॒ना॒वु॒षा॒सा॒न॒क्ता ॥
 इ॒मं य॒ज्ञ॒म॒व॒ता म॒ध्व॒रं नः॑ । दै॒व्या हो॒ता॒रा॒वू॒र्ध्व-म॒ध्व॒रं
 नो॒ऽग्ने॒र्जि॒ह्वा॒म॒भि गृ॑णीतं । कृ॒णु॒तं नः॑ स्वि॒ष्टिं । ति॒स्रो दे॒वी॒र्ब॒र्हि॒रे॒द॒
 स॒द॒न्त्वि॒डा स॒र॒स्व॒ती – [] 30

4.1.8.2 - Padam

ई॒म् । म॒न्द्रा॒सु । प्र॒य॒सः । व॒सुः । चे॒ति॒ष्ठः । व॒सु॒धा॒त॒म इति॑
व॒सु – धा॒त॒मः । च । द्वा॒रः । दे॒वीः । अ॒न्वि॒ति । अ॒स्य । वि॒श्वे ॥
व्र॒ता । द॒द॒न्ते । अ॒ग्नेः । उ॒रु॒व्य॒च॒स इत्यु॒रु – व्य॒च॒सः । धा॒म्ना ॥
प॒त्य॒मा॒नाः । ते इति॑ । अ॒स्य । यो॒ष॒णे इति॑ । दि॒व्ये इति॑ । न । यो॒नौ ॥
उ॒षा॒सा॒न॒क्ता ॥ इ॒मम् । य॒ज्ञम् । अ॒व॒ता॒म् । अ॒ध्व॒रम् । नः । दै॒व्या ॥
हो॒ता॒रौ । ऊ॒र्ध्वम् । अ॒ध्व॒रम् । नः । अ॒ग्नेः । जि॒ह्वा॒म् । अ॒भी॒ति ।
गृ॒णी॒तम् । कृ॒णु॒तम् । नः । स्वि॒ष्टि॒मि॒ति सु॒-इ॒ष्टिम् । ति॒स्रः । दे॒वीः ।
ब॒र्हिः । ए॒ति । इ॒दम् । स॒द॒न्तु । इ॒डा ॥ स॒र॒स्व॒ती । 30 (50)

4.1.8.3

भा॒र॒ती । म॒ही गृ॒णा॒ना । त॒न्न॒स्तु॒री॒प॒म॒द्भु॒तं पु॒रु॒क्षु त्व॒ष्टा सु॒वी॒रं ॥
रा॒य॒स्पो॒षं वि॑ ष्य॒तु ना॒भि॒म॒स्मे । व॒न॒स्प॒तेऽव॑ सृ॒जा रा॒ण॒स्म॒ना
दे॒वेषु॑ । अ॒ग्नि॒र्ह॒व्यं श॑मि॒ता सू॒द॒या॒ति । अ॒ग्ने स्वा॒हा कृ॒णु॒हि
जा॒त॒वे॒द इ॒न्द्रा॒य ह॒व्यं । वि॒श्वे दे॒वा ह॒वि॒रि॒दं जु॑ष॒न्तां ।

हिर॒ण्यग॑र्भः सम॑वर्त॒ताग्रे॑ भू॒तस्य॑ जा॒तः पति॑रेक॒ आसीत् ।

स दा॒धार पृ॒थि॒वीं द्या – [] 31

4.1.8.3 - Padam

भा॒रती॑ । म॒ही । गृ॒णा॒ना । तत् । नः॑ । तु॒री॒पम् । अद्भु॑तम् । पु॒रु॒क्षु ।
त्वष्टा॑ । सु॒वी॒रमि॑ति सु – वी॒रम् । रा॒यः । पोष॑म् । वी॒ति । स्य॑तु ।
नाभि॑म् । अ॒स्मै इति॑ । वन॑स्पते । अवे॑ति । सृ॒ज । ररा॑णः । त्मना॑ ।
दे॒वेषु॑ । अ॒ग्निः । ह॒व्यम् । श॒मि॒ता । सू॒दया॑ति । अ॒ग्ने । स्वाहा॑ ।
कृ॒णु॒हि । जा॒तवे॑द इति॑ जा॒त – वे॒दः । इन्द्रा॑य । ह॒व्यम् । विश्वे॑ ।
दे॒वाः । ह॒विः । इ॒दम् । जु॒षन्ता॑म् । हिर॒ण्यग॑र्भ इति॑ हिर॒ण्य-ग॑र्भः ।
समि॑ति । अ॒वर्त॑त । अ॒ग्रे । भू॒तस्य॑ । जा॒तः । पतिः॑ । ए॒कः ।

आ॒सीत् । सः । दा॒धार । पृ॒थि॒वीम् । द्याम् । 31 (50)

4.1.8.4

–मु॒तेमां॑ कस्मै॑ दे॒वाय॑ ह॒विषा॑ वि॒धेम॑ ।

यः प्रा॑णतो॒ निमि॑षतो॒ महि॑त्वैक॒ इद्रा॑जा जग॒तो ब॒भूव॑ ।

य ई॒शो अ॒स्य द्वि॒पद॑श्चतु॒ष्पदः॑ कस्मै॑ दे॒वाय॑ ह॒विषा॑ वि॒धेम॑ ।

य आ॒त्म॒दा॒ ब॒ल॒दा॒ यस्य॑ वि॒श्व॑ उपा॒स॒ते प्र॒शि॒षं॑ य॒स्य॑ दे॒वाः ।
यस्य॑ छा॒याऽमृ॒तं॑ य॒स्य॑ मृ॒त्युः कस्मै॑ दे॒वाय॑ ह॒विषा॑ वि॒धेम॑ ।
यस्ये॒मे हि॒मव॑न्तो म॒हि॒त्वा यस्य॑ स॒मु॒द्र॒ र॒स॒या स॒हा – [] 32

4.1.8.4 - Padam

उ॒त । इ॒मा॒म् । कस्मै॑ । दे॒वाय॑ । ह॒विषा॑ । वि॒धेम॑ । यः । प्रा॒णत॑ इति॑
प्र – अ॒न॒तः । नि॒मि॒षत॑ इति॑ नि – मि॒षतः॑ । म॒हि॒त्वेति॑ म॒हि – त्वा ।
ए॒कः । इ॒त् । रा॒जा । ज॒गतः॑ । ब॒भू॒व । यः । ई॒शे॑ । अ॒स्य॑ । द्वि॒प॒द
इति॑ द्वि – प॒दः । च॒तु॒ष्प॒द इति॑ च॒तुः – प॒दः । कस्मै॑ । दे॒वाय॑ ।
ह॒विषा॑ । वि॒धेम॑ । यः । आ॒त्म॒दा इ॒त्या॒त्म॒दाः । ब॒ल॒दा इति॑
ब॒ल॒दाः । यस्य॑ । वि॒श्वे॑ । उपा॒स॒त इत्यु॒प – आ॒स॒ते । प्र॒शि॒षमि॑ति॑
प्र – शि॒षम् । यस्य॑ । दे॒वाः । यस्य॑ । छा॒या । अ॒मृ॒तम् । यस्य॑ ।
मृ॒त्युः । कस्मै॑ । दे॒वाय॑ । ह॒विषा॑ । वि॒धेम॑ । यस्य॑ । इ॒मे । हि॒मव॑न्त
इति॑ हि॒म – व॒न्तः । म॒हि॒त्वेति॑ म॒हि – त्वा । यस्य॑ । स॒मु॒द्रम् ।
र॒स॒या । स॒हा । 32 (50)

4.1.8.5

–ऽऽहुः । यस्ये॒माः प्र॒दि॒शो॒ यस्य॑ बा॒हू कस्मै॑ दे॒वाय॑ ह॒विषा॑ वि॒धेम॑ ।
यं क्र॒न्दसी॑ अ॒वसा॑ तस्त॒भाने॑ अ॒भ्यैक्षे॑तां॒ मनसा॑ रे॒जमाने॑ ।
यत्रा॒धि सू॒र उ॒दितौ॑ व्येति॒ कस्मै॑ दे॒वाय॑ ह॒विषा॑ वि॒धेम॑ ।
येन॑ द्यौ॒रुग्रा॑ पृथि॒वी च॑ दृ॒ढे येन॑ सु॒वः स्त॒भितं॑ येन॑ ना॒कः ।
यो अ॒न्तरि॑क्षे रज॒सो वि॒मानः॑ कस्मै॑ दे॒वाय॑ ह॒विषा॑ वि॒धेम॑ ।
आपो॑ ह॒ यन्म॑हती वि॒श्व – [] 33

4.1.8.5 - Padam

आ॒हुः । यस्य॑ । इ॒माः । प्र॒दि॒श इति॑ प्र–दि॒शः । यस्य॑ । बा॒हू इति॑ ।
कस्मै॑ । दे॒वाय॑ । ह॒विषा॑ । वि॒धेम॑ । यम् । क्र॒न्दसी॑ इति॑ । अ॒वसा॑ ।
तस्त॒भाने॑ इति॑ । अ॒भ्यैक्षे॑तामित्य॒भि – ऐक्षे॑तां । मनसा॑ । रे॒जमाने॑
इति॑ । यत्र॑ । अधीति॑ । सू॒रः । उ॒दिता॑वित्युत् – इ॒तौ । व्येतीति॑
वि – एति॑ । कस्मै॑ । दे॒वाय॑ । ह॒विषा॑ । वि॒धेम॑ । येन॑ । द्यौः । उ॒ग्रा ।
पृथि॒वी । च॑ । दृ॒ढे इति॑ । येन॑ । सु॒वः । स्त॒भितम्॑ । येन॑ । ना॒कः ।

यः । अ॒न्तरि॑क्षे । रज॑सः । वि॒मान॑ इति वि-मानः । कस्मै॑ । दे॒वाय॑ ।
ह॒विषा॑ । वि॒धेम॑ । आपः॑ । ह॒ । यत् । म॒हतीः॑ । विश्व॑म् । 33 (50)

4.1.8.6

-मा॒यन् दक्षं॑ दधा॒ना ज॒नय॑न्तीर॒ग्निं ।
ततो॑ दे॒वानां॑ नि॒र्वर्त॑तासु॒रेकः॑ कस्मै॑ दे॒वाय॑ ह॒विषा॑ वि॒धेम॑ ।
यश्चि॑दापो॒ महि॑ना॒ पर्य॑पश्यद्-दक्षं॑ दधा॒ना ज॒नय॑न्तीर॒ग्निं ।
यो दे॒वेष्व॑धि॒ देव॑ ऐ॒क आ॒सीत् कस्मै॑ दे॒वाय॑ ह॒विषा॑ वि॒धेम॑ । 34

4.1.8.6 - Padam

आ॒यन् । दक्ष॑म् । दधा॒नाः । ज॒नय॑न्तीः । अ॒ग्निम् । ततः॑ । दे॒वाना॑म् ।
नि॒रिति॑ । अ॒वर्त॑त । अ॒सुः । ए॒कः । कस्मै॑ । दे॒वाय॑ । ह॒विषा॑ । वि॒धेम॑ ।
यः । चि॒त् । आपः॑ । म॒हिना॑ । प॒र्यप॑श्यदिति॒ परि॑-अपश्यत् । दक्ष॑म् ।
दधा॒नाः । ज॒नय॑न्तीः । अ॒ग्निम् । यः । दे॒वेषु॑ । अधी॑ति । दे॒वः ।
ए॒कः । आ॒सीत् । कस्मै॑ । दे॒वाय॑ । ह॒विषा॑ । वि॒धेम॑ । 34 (34) (अ॒ग्नेः
स - सर॑स्वती - द्या॑ - सह - विश्वं - चतु॑स्त्रिंशच्च) (A8)

Special Korvai for Anuvaakam 29 to 34

(ऊ॒र्ध्वा – यः प्रा॒णतो॑ – य आ॒त्मदा॑ – यस्ये॒मे – यङ्क्र॑न्दसी –
येन॑ द्यौ- रापो॑ ह॒ यत् – ततो॑ दे॒वानां॑ – य॒श्चिदा॑पो – यो दे॒वेषु॑ –
नव॑)

4.1.9.1

आकू॑तिम॒ग्निं प्र॒युज॑ स्वाहा॒ मनो॑ मे॒धाम॒ग्निं प्र॒युज॑ स्वाहा॒
चि॒त्तं वि॒ज्ञात॑म॒ग्निं प्र॒युज॑ स्वाहा॒ वाचो॑ वि॒धृति॑म॒ग्निं प्र॒युज॑
स्वाहा॒ प्रजा॑पतये॒ मनवे॑ स्वाहा॒ऽग्नये॑ वै॒श्वान॒राय॑ स्वाहा॒ विश्वे॑ दे॒वस्य॑
ने॒तुर्म॑तो॒ वृणी॑त स॒ख्यं वि॒श्वे रा॒य इ॒षुध्य॑सि द्यु॒म्नं वृ॑णीत पु॒ष्यसे॑
स्वाहा॒ मा सु॑ भि॒त्था मा सु॑ रि॒षो दृ॒हस्व॑ वी॒डय॑स्व सु ।
अ॒ंब धृ॑ष्णु वी॒रय॑स्वा – [] 35

4.1.9.1 - Padam

आकू॑तिमि॒त्या – कू॒तिम् । अ॒ग्निम् । प्र॒युज॑मि॒ति प्र – यु॒जम् ।
स्वाहा॑ । मनः॑ । मे॒धाम् । अ॒ग्निम् । प्र॒युज॑मि॒ति प्र-यु॒जम् । स्वाहा॑ ।
चि॒त्तम् । वि॒ज्ञात॑मि॒ति वि – ज्ञा॒तम् । अ॒ग्निम् ।

प्र॒युज॑मि॒ति प्र॒ – युज॑म् । स्वाहा॑ । वा॒चः । वि॒धृ॑तिमि॒ति वि॒-धृ॑तिम् ।
अ॒ग्निम् । प्र॒युज॑मि॒ति प्र॒ – युज॑म् । स्वाहा॑ । प्र॒जाप॑तय॒ इति॑
प्र॒जा – प॑तये । म॒नवे॑ । स्वाहा॑ । अ॒ग्नये॑ । वै॒श्वान॑राय॒ । स्वाहा॑ ।
वि॒श्वे॑ । दे॒वस्य॑ । ने॒तुः । म॒र्तः । वृ॒णीत॑ । स॒ख्यम् । वि॒श्वे॑ । रा॒यः ।
इ॒षु॒ध्य॒सि । द्यु॒म्नम् । वृ॒णीत॑ । पु॒ष्यसे॑ । स्वाहा॑ । मा । स्वि॒ति ।
भि॒त्थाः । मा । स्वि॒ति । रि॒षः । दृ॒ह॒स्व । वी॒डय॑स्व । सु । अ॒ंब ।
धृ॒ष्णु । वी॒रय॑स्व । 35 (50)

4.1.9.2

–ऽग्नि॑श्चेदं॒ करि॑ष्यथः । दृ॒ह॒स्व दे॒वि पृ॑थि॒वि स्व॑स्तय॒ आसु॑री॒ माया॑
स्व॒धया॑ कृ॒ताऽसि॑ । जु॒ष्टं दे॒वाना॑मि॒दम॑स्तु॒ हव्य॑म॒रि॒ष्टा त्व॑मु॒दिहि॑ य॒ज्ञे
अ॒स्मिन् । मि॒त्रैता॑मु॒खां तपै॑षा मा भे॒दि । ए॒तां ते॒ परि॑ द॒दाम्य॑भि॒त्त्यै ।
द्रू॒वन्नः॑ स॒र्पिरा॑सु॒तिः प्र॒लौ होता॑ वरे॒ण्यः । स॒हस॑स्पु॒त्रो अद्भु॑तः ।
पर॑स्या॒ अधि॑ सँव॒तोऽव॑रा॒ अ॒भ्या – [] 36

4.1.9.2 - Padam

अ॒ग्निः । च । इ॒दम् । क॒रिष्य॑थः । दृ॒ह॑स्व । दे॒वि । पृ॒थि॒वि ।
स्व॒स्तये॑ ॥ आ॒सु॒री । मा॒या । स्व॒धये॑ति स्व – ध॒या । कृ॒ता । अ॒सि ।
जु॒ष्टम् । दे॒वाना॑म् । इ॒दम् । अ॒स्तु । ह॒व्यम् । अ॒रि॒ष्टा । त्वम् ।
उ॒दि॒ति । इ॒हि । य॒ज्ञे । अ॒स्मिन् । मि॒त्र । ए॒ताम् । उ॒खाम् । तप॑ ।
ए॒षा । मा । भे॒दि । ए॒ताम् । ते । प॒री॒ति । द॒दामि॑ । अ॒भित्यै॑ । दू॒वन्न॑
इति॑ द्रु – अ॒न्नः । सर्पि॑रा॒सुति॑रिति॑ सर्पिः – आ॒सु॒तिः । प्र॒त्नः ।
हो॒ता ॥ वो॒रेण्यः॑ । स॒हसः॑ । पु॒त्रः । अ॒द्भु॒तः । प॒रस्याः॑ । अ॒धी॒ति ।
सँ॒वत॑ इति॑ सं – व॒तः । अ॒व॒रान् । अ॒भि । ए॒ति । 36 (50)

4.1.9.3

तर॑ । य॒त्रा॒हम॑स्मि ताँ॑ अ॒व । प॒रम॑स्याः प॒राव॑तो रोहि॒दश्च॑
इ॒हाऽग॑हि । पु॒री॒ष्यः पु॒रु॒प्रि॒योऽग्ने॑ त्वं त॒रा मृ॑धः । सी॒द त्वं
मा॒तु॒रस्या॑ उ॒प॒स्थे वि॒श्वा॒न्यग्ने॑ व॒यु॒नानि॑ वि॒द्वान् ।
मै॒नाम॑र्चि॒षा मा तप॑साऽभि शू॒शु॒चोऽन्त॑रस्याँ॑ शु॒क्र ज्यो॑तिर्वि॒ भा॒हि ।
अ॒न्त॒रग्ने॑ रु॒चा त्व॑मु॒खायै॑ स॒दने॑ स्वे । तस्या॑स्त्वँ॑ ह॒रसा॑ तपन् ()

जा॒तवे॑दः शि॒वो भव॑ । शि॒वो भू॒त्वा म॒ह्यम॒ग्नेऽथो॑ सी॒द शि॒वस्त्वं॑ ।

शि॒वाः कृ॒त्वा दि॒शः सर्वाः॑ स्वां॑ यो॒निमि॒हाऽऽस॑दः । 37

4.1.9.3 - Padam

तर॑ । यत्र॑ । अ॒हम् । अ॒स्मि । तान् । अ॒व । प॒रम॒स्याः॑ । प॒राव॒त इति॑

प॒रा – व॒तः । रो॒हिद॑श्च इति॑ रो॒हि॒त् – अ॒श्वः । इ॒ह । ए॒ति । ग॒हि ।

पु॒री॒ष्यः । पु॒रु॒प्रि॒य इति॑ पु॒रु – प्रि॒यः । अ॒ग्ने॑ । त्वम् । तर॑ । मृ॒धः ।

सी॒द । त्वम् । मा॒तुः । अ॒स्याः । उ॒प॒स्थ इत्यु॒प – स्थे॑ । वि॒श्वानि॑ ।

अ॒ग्ने॑ । व॒यु॒नानि॑ । वि॒द्वान् । मा । ए॒नाम् । अ॒र्चि॒षा॑ । मा । त॒प॒सा ।

अ॒भी॒ति॑ । शू॒शु॒चः । अ॒न्तः । अ॒स्याम् । शु॒क्र॒ज्यो॑तिरिति॑

शु॒क्र – ज्यो॑तिः । वी॒ति॑ । भा॒हि । अ॒न्तः । अ॒ग्ने॑ । रु॒चा । त्वम् ।

उ॒खा॒यै॑ । स॒द॒ने॑ । स्वे॑ । त॒स्याः॑ । त्वम् । ह॒र॒सा । त॒प॒न् () ।

जा॒तवे॑द इति॑ जा॒त–वे॑दः । शि॒वः । भव॑ । शि॒वः । भू॒त्वा । म॒ह्यम्॑ ।

अ॒ग्ने॑ । अ॒थो इति॑ । सी॒द । शि॒वः । त्वम् । शि॒वाः । कृ॒त्वा ।

दि॒शः । सर्वाः॑ । स्वा॒म् । यो॒नि॒म् । इ॒ह । ए॒ति । अ॒स॒दः । 37 (70)

(वी॒र॒य॒स्वा – ऽऽ – त॒प॒न् – वि॒श्र॒तिश्च॑) (A9)

4.1.10.1

यद॒ग्ने॑ या॒नि का॒नि चा॒ऽऽते॑ दा॒रू॒णि द॒ध्म॒सि॑ । तद॒स्तु॑ तु॒भ्य॒मिद्-घृ॒तं
तज्जु॒षस्व॑ यवि॒ष्य॑ । यद॒त्यु॒प॒जि॒ह्वि॒का यद्व॒म्रो अ॒ति॒स॒र्प॒ति॑ ।

सर्वं॑ तद॒स्तु ते॑ घृ॒तं तज्जु॒षस्व॑ यवि॒ष्य॑ ।

रा॒त्रि॒र॒ रा॒त्रि॒म॒प्र॒या॒वं भ॒र॒न्तो॒ऽश्वा॒ये॒व ति॒ष्ठ॒ते घा॒स॒म॒स्मै॑ ।

रा॒य॒स्पो॒षे॒ण स॒मि॒षा म॒द॒न्तो॒ऽग्ने॑ मा ते॒ प्र॒ति॒वै॒शा रि॒षाम॑ ।

ना॒भा – [] 38

4.1.10.1 - Padam

यत् । अ॒ग्ने॑ । या॒नि॑ । का॒नि॑ । च॒ । ए॒ति॑ । ते॒ । दा॒रू॒णि॑ । द॒ध्म॒सि॑ ।

तत् । अ॒स्तु॑ । तु॒भ्य॒म् । इ॒त् । घृ॒त॒म् । तत् । जु॒ष॒स्व॒ । यवि॒ष्य॑ ।

यत् । अ॒त्ति॑ । उ॒प॒जि॒ह्वि॒के॒त्यु॒प – जि॒ह्वि॒का॑ । यत् । व॒म्रः॑ ।

अ॒ति॒स॒र्प॒ती॒त्य॒ति-स॒र्प॒ति॑ । स॒र्व॒म् । तत् । अ॒स्तु॑ । ते॒ । घृ॒त॒म् । तत् ।

जु॒ष॒स्व॒ । यवि॒ष्य॑ । रा॒त्रि॒र॒ रा॒त्रि॒मि॒ति॑ रा॒त्रि॒म् – रा॒त्रि॒म् ।

अ॒प्र॒या॒व॒मि॒त्य॒प्र॒-या॒व॒म् । भ॒र॒न्तः॑ । अ॒श्व॒ाय॑ । इ॒व॒ । ति॒ष्ठ॒ते॑ । घा॒स॒म् ।
अ॒स्मै॑ । रा॒यः॑ । पो॒षे॒ण॑ । स॒मि॒ति॑ । इ॒षा॑ । म॒द॒न्तः॑ । अ॒ग्ने॑ ॥ मा॒ । ते॒ ।
प्र॒ति॒वे॒शा॒ इति॑ प्र॒ति॑ – वे॒शाः॑ । रि॒षाम॑ । ना॒भा॑ ॥ 38 (50)

4.1.10.2

पृ॒थि॒व्याः॑ स॒मि॒धा-न॒म॒ग्नि॑ꣳ रा॒य॒स्यो॒षाय॑ बृ॒ह॒ते॑ ह॒वाम॑हे ।
इ॒र॒म॒म॒दं॑ बृ॒ह॒दु॒क्थं॑ य॒ज॒त्रं॑ जे॒तार॑म॒ग्निं॑ पृ॒त॒ना॒सु॑ सा॒स॒हिं॑ ।
याः॑ से॒ना॒ अ॒भी॒त्वा॒री॒रा-व्या॒धि॒नी-रु॒ग॒णा॑ उ॒त॑ ।
ये॒ स्ते॒ना॒ ये च॑ त॒स्करा॑स्ताꣳस्ते॒ अ॒ग्नेऽपि॑ द॒धाम्या॑स्ये॒ ॥
दꣳष्ट्रा॑भ्यां म॒लि॒म्लून्॑ जं॒भ्यै-स्त॑स्कराꣳ उ॒त॑ ।
ह॒नू॒भ्याꣳ स्ते॒नान्-भ॒ग॒व॒स्ताꣳ-स्त्वं॑ खा॒द॒ सु॒खा॒दि॒तान्॑ ।
ये॒ जने॑षु म॒लि॒म्लवः॑ स्ते॒ना-स॒स्त॑स्करा॒ वने॑ ॥ ये – [] 39

4.1.10.2 - Padam

पृ॒थि॒व्याः॑ । स॒मि॒धा॒न॒मि॒ति॑ सं-इ॒धा॒न॒म् । अ॒ग्नि॒म् । रा॒यः॑ । पो॒षाय॑ ।
बृ॒ह॒ते॑ । ह॒वाम॑हे । इ॒र॒म॒द॒मि॒ती॒रं॑ – म॒द॒म् । बृ॒ह॒दु॒क्थ॒मि॒ति॑
बृ॒ह॒त् – उ॒क्थ॒म् । य॒ज॒त्रम्॑ । जे॒तार॑म् । अ॒ग्नि॒म् । पृ॒त॒ना॒सु॑ ।

सा॒सहि॒म् । याः । से॒नाः । अ॒भी॒त्व॒री॒रित्य॑भि – इ॒त्व॒रीः ।
आ॒व्या॒धि॒नी॒रित्या॑ – व्या॒धि॒नीः । उ॒ग॒णाः । उ॒त । ये । स्ते॒नाः । ये ।
च । त॒स्कराः । तान् । ते । अ॒ग्ने । अ॒पी॒ति । द॒धामि॑ । आ॒स्ये॑ ।
द॒ष्ट्रा॒भ्याम् । म॒लि॒म्लू॒न् । जं॒भ्यैः । त॒स्करान् । उ॒त । ह॒नू॒भ्यामि॒ति
ह॒नु – भ्याम् । स्ते॒नान् । भ॒ग॒व इति॑ भ॒ग – वः । तान् । त्वम् ।
खा॒द । सु॒खादि॑तानि॒ति सु – खा॒दि॒तान् । ये । ज॒नेषु॑ । म॒लि॒म्ल॒वः ।
स्ते॒नासः॑ । त॒स्कराः । व॒ने । ये । 39 (50)

4.1.10.3

क॒क्षे॒ष्वघा॑ य॒वस्ता॑ ऽस्ते॒ द॒धामि॑ जं॒भयोः॑ ।
यो अ॒स्मभ्य॑म॒राती॒याद्-यश्च॑ नो॒ द्वेष॑ते॒ जनः॑ ।
नि॒न्दाद्यो॑ अ॒स्मान् दि॒प्सा॒च्च स॒र्वं तं म॑स्मसा॒ कुरु॑ ।
स॒ञ्शितं॑ मे॒ ब्रह्म॑ स॒ञ्शितं॑ वी॒र्यं॑ ब॒लं ।
स॒ञ्शितं॑ क्ष॒त्रं जि॒ष्णु॒ यस्या॑ ऽह॒मस्मि॑ पु॒रोहि॑तः ।
उ॒देषां॑ बा॒हू अ॒तिर॑मु॒द्वर्च॑ उ॒दू ब॒लं ।
क्षि॒णोमि॑ ब्रह्म॒णा-ऽमि॒त्रानु॑न्नयामि – [] 40

4.1.10.3 - Padam

कक्षे॑षु । अ॒घाय॑व इत्य॑घ – यवः॑ । तान् । ते । द॒धामि॑ । जं॑भयोः ।
यः । अ॒स्मभ्य॑मित्य॒स्मभ्य॑म् । अ॒राती॑यात् । यः । च । नः । द्वे॑षते ।
जनः॑ । नि॒न्दात् । यः । अ॒स्मान् । दि॒प्सात् । च । स॒र्वम् । तम् ।
म॒स्मसा॑ । कुरु॑ । सञ्शित॑मिति सं – शित॑म् । मे । ब्र॒ह्म ।
सञ्शित॑मिति सं – शित॑म् । वी॒र्यम् । ब॒लम् । सञ्शित॑मिति
सं – शित॑म् । क्ष॒त्रम् । जि॒ष्णु । यस्य॑ । अ॒हम् । अ॒स्मि । पु॒रोहि॑त
इति॑ पु॒रः – हि॒तः । उ॒दिति॑ । ए॒षाम् । बा॒हू इति॑ । अ॒तिर॑म् । उ॒दिति॑ ।
वर्चः॑ । उ॒दिति॑ । उ । ब॒लम् । क्षि॒णोमि॑ । ब्र॒ह्मणा॑ । अ॒मित्रा॑न् ।
उ॒दिति॑ । न॒यामि॑ । 40 (50)

4.1.10.4

स्वाञ् अ॒हं । दृ॒शानो॑ रु॒क्म उ॒र्व्या व्य॑द्यौर्दु॒र्मर्ष॑मायुः श्रि॒ये रु॒चानः॑ ।
अ॒ग्नि॒रमृ॑तो॒ अभ॑वद्वयो॒भिर्य॑दे॒नं द्यौ॑र॒जन॑यथ् सु॒रेताः॑ ।
वि॒श्वा रू॒पाणि॑ प्र॒ति मुञ्च॑ते क॒विः प्रा॒ञ्सा॒वीद्भ॑द्रं द्वि॒पदे॑ चतु॒ष्पदे॑ ।
वि ना॒कम॑ख्यथ् स॒विता॑ व॒रेण्यो॑ऽनु प्र॒याण॑मु॒षसो॑ वि॒राज॑ति ।

न॒क्तो॒षासा॑ सम॒नसा॑ वि॒रूपे॑ धा॒पये॑ते शि॒शुमे॑क॒ꣳ समी॒ची ।

द्या॒वा क्षा॒मा रु॒क्मो – [] 41

4.1.10.4 - Padam

स्वा॒न् । अ॒हम् । दृ॒शा॒नः । रु॒क्मः । उ॒र्व्या । वी॒ति । अ॒द्यौत् ।
दु॒र्मर्ष॑मि॒ति दुः – मर्ष॑म् । आ॒युः । श्रि॒ये । रु॒चा॒नः । अ॒ग्निः ।
अ॒मृतः॑ । अ॒भवत् । वयो॑भि॒रिति॑ वयः – भिः । यत् । ए॒नम् । द्यौः ।
अ॒ज॒न॒यत् । सु॒रेता॑ इति॑ सु – रेताः॑ । वि॒श्वा । रू॒पा॒णि । प्र॒तीति॑ ।
मु॒ञ्च॒ते । क॒विः । प्रेति॑ । अ॒सा॒वीत् । भ॒द्रम् । द्वि॒प॒द इति॑ द्वि॒पदे॑ ।
च॒तुष्प॑द इति॑ च॒तुः – प॒दे । वी॒ति । ना॒कम् । अ॒ख्यत् । स॒वि॒ता ।
व॒रेण्यः॑ । अ॒न्वि॒ति । प्र॒या॒णमि॑ति॒ प्र – या॑नम् । उ॒ष॒सः । वी॒ति ।
रा॒ज॒ति । न॒क्तो॒षासा॑ । स॒म॒न॒से॒ति स – म॒न॒सा । वि॒रूपे॑ इति॑
वि॒रूपे॑ । धा॒पये॑ते इति॑ । शि॒शुम् । ए॒कम् । स॒मी॒ची इति॑ । द्या॒वा ।
क्षा॒म । रु॒क्मः । 41 (50)

4.1.10.5

अ॒न्तर्वि॑ भा॒ति दे॒वा अ॒ग्निं धा॑रयन् द्र॒वि॒णो॒दाः ।
सु॒पर्णो॑ऽसि ग॒रु॒त्मा॒न् त्रि॒वृ॒त्ते शि॒रो गाय॑त्रं चक्षुः स्तोम॑ आ॒त्मा साम॑
ते त॒नूर्वा॑मदे॒व्यं बृ॒हद्-रथ॑न्तरे पक्षौ य॒ज्ञाय॑ज्ञियं पु॒च्छं
छन्दा॑ऽस्यङ्गानि धि॒ष्णि॒याः श॒फा यजू॑षि नाम ।
सु॒पर्णो॑ऽसि ग॒रु॒त्मा॒न् दि॒वं गच्छ॑ सु॒वः प॒त । 42

4.1.10.5 - Padam

अ॒न्तः । वी॒ति । भा॒ति । दे॒वाः । अ॒ग्निम् । धा॑रयन् । द्र॒वि॒णो॒दा इति॑
द्र॒वि॒णः - दाः । सु॒पर्ण॑ इति सु - पर्णः । अ॒सि । ग॒रु॒त्मा॒न् ।
त्रि॒वृ॒दिति॑ त्रि - वृत् । ते । शि॒रः । गाय॑त्रम् । चक्षुः । स्तोमः ।
आ॒त्मा । साम॑ । ते । त॒नूः । वा॒मदे॒व्यमि॑ति वाम - दे॒व्यम् ।
बृ॒हद्-रथ॑न्तरे इति बृहत् - रथन्तरे । पक्षौ । य॒ज्ञाय॑ज्ञियम् । पु॒च्छम् ।
छन्दा॑ऽसि । अ॒ङ्गानि॑ । धि॒ष्णि॒याः । श॒फाः । यजू॑षि । नाम ।
सु॒पर्ण॑ इति सु - पर्णः । अ॒सि । ग॒रु॒त्मा॒न् । दि॒वम् । गच्छ॑ ।

सुवः॑ । पत॑ । 42 (38) (ना॒भा – वने॑ ये – न॒यामि॑ – क्षामा॑ रुक्मो॑॥
– ऽष्टात्रिं॑शच्च) (A10)

4.1.11.1

अग्ने॑ यं य॒ज्ञम॑ध्वरं॒ विश्व॑तः॒ परि॑भूरसि॑ । स इ॒द्वेषु॑ गच्छति॑ ।
सोम॑ यास्ते॒ मयो॑भुव॒ ऊतयः॑ सन्ति॑ दाशु॒षे॑॥ ताभि॑र्नोऽविता॑ भव॑ ।
अग्नि॑र्मूर्धा॒ भुवः॑ । त्वन्नः॑ सोम॒ या ते॑ धामा॑नि ।
तथ् स॒वितु॑र्वरे॒ण्यं॑ भर्गो॑ देव॒स्य॑ धीमहि॑ । धियो॑ यो नः प्रचो॑दयात्॑॥
अचि॑त्ती यच्च॑कृ॒मा दै॒व्ये जने॑ दीनैर्दक्षैः॑ प्रभू॑ती पूरुष॒त्वता॑॥ 43

4.1.11.1 - Padam

अग्ने॑॥ यम् । य॒ज्ञम् । अध्व॑रम् । विश्व॑तः॒ परि॑भूरिति॑ परि – भूः ।
असि॑ । सः । इत् । दे॒वेषु॑ । गच्छ॑ति । सोम॑ । याः । ते । मयो॑भुव॒
इति॑ मयः – भुवः॑ । ऊतयः॑ । सन्ति॑ । दाशु॒षे॑॥ ताभिः॑ । नः ।
अवि॑ता । भव॑ । अग्निः॑ । मूर्धा॑ । भुवः॑ । त्वम् । नः । सोम॑ । या ।
ते । धामा॑नि । तत् । स॒वितुः॑ । वरे॒ण्यम् । भर्गः॑ । देव॒स्य॑ । धीमहि॑ ।
धियः॑ । यः । नः । प्रचो॑दयादिति॑ प्र – चो॑दयात्॑॥ अचि॑त्ती । यत् ।

च॒क॒म॒ । दै॒व्यै॑ ॥ ज॒ने॑ ॥ दी॒नैः॑ ॥ दक्षैः॑ ॥ प्र॒भू॒तीति॑ प्र – भू॒ती ॥

पू॒रुष॑त्वतेति॑ पू॒रुष॑ – त्वता॑ ॥ 43 (50)

4.1.11.2

दे॒वेषु॑ च स॒वित॑र्मा॒नुषेषु॑ च त्व॒न्नो अ॒त्र सु॒वता॑द॒नाग॑सः ।

चो॒दयि॑त्री सू॒नृता॑नां चे॒तन्ती॑ सु॒मती॑नां । य॒ज्ञं द॑धे सर॒स्वती॑ ।

पा॒वीर॑वी क॒न्या चि॒त्रायुः॑ सर॒स्वती॑ वी॒रप॑त्नी धि॒यं धा॑त् ।

ग॒नाभि॑रच्छि॒द्रं श॒रणं स॒जोषा॑ दु॒राध॑र्षं गृ॒णते॑ श॒र्म य॑स॒त् ।

पू॒षा गा अ॒न्वेतु॑ नः पू॒षा र॑क्ष॒त्वर्व॑तः । पू॒षा वाज॑स॒नोतु॑ नः । शु॒क्रं

ते अ॒न्यद्व॑ज॒तं ते अ॒न्य – [] 44

4.1.11.2 - Padam

दे॒वेषु॑ । च । स॒वि॒तः । मा॒नुषे॑षु । च । त्व॒म् । नः । अ॒त्र । सु॒वता॑त् ।

अ॒नाग॑सः । चो॒दयि॑त्री । सू॒नृता॑नाम् । चे॒तन्ती॑ । सु॒मती॑नामि॒ति

सु – म॒तीना॑म् । य॒ज्ञम् । द॑धे । सर॒स्वती॑ । पा॒वीर॑वी । क॒न्या ।

चि॒त्रायु॑रि॒ति चि॒त्र – आ॒युः । सर॒स्वती॑ । वी॒रप॑त्नीति॑ वी॒र – प॑त्नी ।

धि॒यम् । धा॑त् । ग॒नाभिः॑ । अ॒च्छि॒द्रम् । श॒रणम् ।

स॒जोषा॑ इति॑ स-जोषाः॑ । दु॒राध॑र्षमि॒ति दुः॑ – आ॒धर्ष॑म् । गृ॒णते॑ ।
श॒र्म । य॒ञ्स॑त् । पू॒षा । गाः । अ॒न्वि॒ति । ए॒तु । नः॑ । पू॒षा । र॒क्ष॒तु ।
अ॒र्व॒तः । पू॒षा । वा॒ज॒म् । स॒नो॒तु । नः॑ । शु॒क्र॒म् । ते॑ । अ॒न्य॒त् ।
य॒ज॒त॒म् । ते॑ । अ॒न्य॒त् । 44 (50)

4.1.11.3

–द्विषु॑रूपे अ॒ह॒नी द्यौ॑रि॒वासि॑ । वि॒श्वा हि॑ मा॒या अ॒व॒सि स्व॑धा॒वो भ॒द्रा
ते॑ पू॒षन्नि॒ह रा॒तिर॑स्तु । ते॑ऽव॒र्ध॒न्त स्व॑त॒वसो॑ म॒हि॒त्व॒ना ऽऽना॑कं
त॒स्थु॒रु॒रु च॑क्रि॒रे स॒दः । वि॒ष्णु र्य॑द्वाऽऽव॒द्-वृ॑षणं म॒द॒च्यु॒तं व॑यो न
सी॒द॒न्न॒धि ब॑र्हि॒षि प्रि॒ये । प्र॒चि॒त्र॒म॒र्कं गृ॑ण॒ते तु॒राय॑ मा॒रु॒ताय॑ स्व॒त॒व॒से
भ॒र॒ध्वं । ये स॒हाञ्सि॑ स॒ह॒सा स॒ह॒न्ते – [] 45

4.1.11.3 - Padam

वि॒षु॒रूपे॑ इति॑ वि॒षु – रू॒पे । अ॒ह॒नी इति॑ । द्यौः॑ । इ॒व । अ॒सि ।
वि॒श्वाः॑ । हि॑ । मा॒याः । अ॒व॒सि । स्व॒धा॒व इति॑ स्व॒धा – वः॑ । भ॒द्रा ।
ते॑ । पू॒ष॒न् । इ॒ह । रा॒तिः । अ॒स्तु । ते॑ । अ॒व॒र्ध॒न्त । स्व॒त॒व॒स इति॑
स्व – त॒व॒सः॑ । म॒हि॒त्व॒नेति॑ म॒हि – त्व॒ना । ए॒ति । ना॒क॒म् । त॒स्थुः॑ ।

उ॒रु । च॒क्रि॒रे । स॒दः । वि॒ष्णुः । यत् । ह॒ । आ॒वत् । वृ॒षण॑म् ।
म॒द॒च्यु॒त॒मि॒ति॒ म॒द – च्यु॒त॒म् । व॒यः । न । सी॒दन् । अधी॑ति ।
ब॒र्हि॒षि । प्रि॒ये । प्रे॑ति । चि॒त्रम् । अ॒र्कम् । गृ॒ण॒ते । तु॒राय॑ ।
मा॒रु॒ताय॑ । स्व॒त॒व॒स इति॑ स्व – त॒व॒से । भ॒र॒ध्वम् । ये । स॒हा॒सि॑ ।
स॒ह॒सा । स॒ह॒न्ते॑ । 45 (50)

4.1.11.4

रे॒ज॒ते अ॒ग्ने पृ॒थि॒वी म॒खेभ्यः॑ । वि॒श्वे दे॒वा वि॒श्वे दे॒वाः ।
द्या॒वा नः॑ पृ॒थि॒वी इ॒मं॑ सि॒ध्रम॒द्य दि॒वि॒स्पृ॒शं॑ ।
य॒ज्ञं दे॒वेषु॑ य॒च्छ॒तां । प्र॒ पूर्॒व॒जे पि॒तरा॑ न॒व्यसी॑भिर्गी॒र्भिः
कृ॒णु॒ध्वं॑ स॒दने॑ ऋ॒त॒स्य॑ । आ नो॑ द्या॒वापृ॒थि॒वी दै॒व्येन॑ ज॒नेन॑ या॒तं
म॒हि वां॑ व॒रू॒थं । अ॒ग्निं॑ स्तो॒मेन॑ बो॒धय॑ स॒मि॒धानो॑ अ॒मर्त्यं॑ ।
ह॒व्या दे॒वेषु॑ नो॑ द॒धत् । स ह॒व्य॒वा॒ड॒मर्त्यं॑ उ॒शि॒गू॒तश्च॑ नो॒हितः॑ () ।
अ॒ग्नि॒र्धिया॑ स॒मृ॒ण्व॒ति । श॒न्नो भ॑वन्तु॒ वा॒जे॒वा॒जे । 46

4.1.11.4 - Padam

रे॒जते॑ । अ॒ग्ने । पृ॒थि॒वी । म॒खेभ्यः॑ । वि॒श्वे॑ ॥ दे॒वाः । वि॒श्वे॑ ॥ दे॒वाः ।
द्या॒वा ॥ नः॑ । पृ॒थि॒वी इति॑ । इ॒मम् । सि॒ध्रम् । अ॒द्य । दि॒वि॒स्पृ॒शमि॑ति
दि॒वि – स्पृ॒शम् ॥ य॒ज्ञम् । दे॒वेषु॑ । य॒च्छता॑म् । प्रेति॑ । पू॒र्वजे॑ इति॑
पू॒र्व-जे॑ । पि॒तरा॑ ॥ न॒व्यसी॑भिः । गी॒र्भिः । कृ॒णु॒ध्वम् । स॒दने॑ इति॑ ।
ऋ॒तस्य॑ । एति॑ । नः॑ । द्या॒वापृ॒थि॒वी इति॑ द्या॒वा – पृ॒थि॒वी । दै॒व्येन॑ ।
ज॒नेन॑ । या॒तम् । म॒हि । वा॒म् । व॒रूथ॑म् । अ॒ग्निम् । स्तो॒मेन॑ ।
बो॒धय॑ । स॒मि॒धान॑ इति॑ सं – इ॒धानः॑ । अ॒मर्त्य॑म् । ह॒व्या । दे॒वेषु॑ ।
नः॑ । द॒धत् । सः॑ । ह॒व्यवा॑डिति॑ ह॒व्य – वाट् । अ॒मर्त्यः॑ । उ॒शिक् ।
दू॒तः । च॒नो॑हि॒तः () । अ॒ग्निः । धि॒या । स॒मिति॑ । ऋ॒ण्वति॑ । श॒म् ।
नः॑ । भ॒वन्तु॑ । वा॒जेवा॑ज इति॑ वा॒जे – वा॒जे । 46 (58) (पु॒रुष॑त्वता॑ –
य॒जत॑न्तो॑ अ॒न्यथ् – स॒हन्तो॑ – च॒नो॑हि॒तो – ऽष्टौ च॑) (A11)

पद पाठे (वाक्य सहित) – चतुर्थकाण्डे – प्रथमः प्रश्नः

PraSna Korvai with starting Padams of 1 to 11 Anuvaakams :-

(यु॒ञ्जान॑ – इ॒माम॑गृ॒भ्णन् – दे॒वस्य॑ – सन्ते॑ – वि पाज॑सा –
वस॑वस्त्वा – समा॑स्त्वो – द॒र्ध्वा – अ॒स्याकू॑तिं – य॑दग्ने॒ यान् –
यग्ने॑ यं य॑ज्ञ – मे॒काद॑श)

Korvai with starting Padams of 1, 11, 21 Series of Panchaatis :-

(यु॒ञ्जानो॑ – वर्म॑ च स्थ – आ॒दित्य॑स्त्वा – भा॒रती॑ – स्वा॒ अ॒ह॒
– षट्च॑त्वारि॒ंशत्)

First and Last Padam of First Prasnam of Kandam 4 :-

(यु॒ञ्जानो॑ – वाजे॑वाजे)

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

चतुर्थ काण्डे प्रथमः प्रश्नः समाप्तः ॥

पद पाठे (वाक्य सहित) – चतुर्थकाण्डे – प्रथमः प्रश्नः

Details of Panchati and Padam for Kandam 4 – Prasanam 1 – TS 4.1

	Panchati	Padams
Anuvakam 1	4	203
Anuvakam 2	5	270
Anuvakam 3	4	177
Anuvakam 4	4	186
Anuvakam 5	4	204
Anuvakam 6	3	169
Anuvakam 7	4	184
Anuvakam 8	6	284
Anuvakam 9	3	170
Anuvakam 10	5	238
Anuvakam 11	4	208
Total →	46	2293

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site www.vedavms.in